


MPE NKUNA YA NGE KE BAKA

MWELO YA MBENI YA YANDI

 Mu kele, mutindu na bambala mingi, ngunga mosi to zole na manima ya ntangu. Pasteur telemaka, yandi tubaka, “Ntangu yayi, samu na beno nionso mu ke zola kukotisa muntu yina me kwisa na manima ya ntangu Tata Branham.” Mbote, mu kele na bima mingi ya kusala yawu yina mu—mu ke kwisaka kaka bantangu yankaka na manima ya ngunga. Kasi bubu yayi mu lendaka yawu ve. Ya vwandaka samu na kilumbu yina me sala yawu mbala yayi. Mu lendaka tula yawu na zulu ya kilumbu mpe kuzwa kimpwanza. Mu zolaka vutula yawu, Mpangi Rose, kaka samu na mwa ntangu fioti. Mbote, Mpangi-kento Rose. Mpe mu ke na kiesa na kuvwanda na Mpangi Rose mpe Mpangi-kento Rose, na suka yayi awa, mpe Mpangi Sharrit, mpe bampangi mingi ya babakala, beno bantu ya mbote kuna.

² Mu kuwaka ti, muntu vwandaka tuba na munu, “Ntangu mvula ke nokaka na Phoenix, bantu nionso ke bikalaka na mbeto,” ya kele nsobolo, beno zaba. Mosi ya bilumbu yayi mu ke baka madia ya mpamba. Ba me tuba na munu ti nge lendaka baka madia ya mpamba konso kilumbu yina mwini ke sema ve. Mu ke tala yawu mbote bubu yayi, samu na kusala bawu kufuta samu na yawu.

³ Mu vwandaka tuba mazono na nkokila, kuna na dibuundu mosi. Ya kieleka mu ke bambuka moyo ve nkumbu ya yawu. Mpe na yina beto me lutisa bantangu ya mbote, mazono na nkokila, kuna na lukutakanu. Mpe kuna na sika ya Mpangi Outlaw, mpe kuna na Tempe, mpe beto vwanda kuzwa kaka ntangu mosi ya mbote na kimpangi yayi. Mpe mu ke vingila kukutana na bampangi-babakala yayi nionso ya balongi na lukutakanu, na yina beto ke kuzwa ntangu ya kuzieta, Mpangi Rose, mpe kusolola mosi na yankaka. Mpe yawu yina mu me kwisa kusala, ya kele samu na kuvwanda na kimpangi. Mpe beto vwandaka . . . beto vwandaka tala na manaka ya beto mpe beto me mona bisika ya kulutila mingi. Kasi mu banza ti yayi vwandaka bweso ya kulutila nene, samu mu zolaka ku—kukutana na bantu ya mutindu yankaka, kumona bawu mpe kuzieta.

⁴ Bantangu yankaka na kulongaka, ba ke bakulaka balongi nionso na mutindu ya yimbi, na mutindu mosi to yankaka. Bambala mingi, bantu ke bakaka kima yina beno me tuba mpe kaka . . . Ya me yekama fioti na bawu, na yina ba ke tuba yawu mutindu yina. Mpe na manima muntu yankaka ke baka yawu,

ya kele ya kutengama fioti mingi. Kima ya ntete beno zaba, ya ke swaswana na yina ba me tuba.

⁵ Na yina—na yina beto, bambala mingi, ntangu beto ke longaka, mu ke tubilaka mingi ba-denomination mpe ba-organisation mpe nionso yina. Ntangu yankaka, bantu ke tubaka, “Mpangi Branham ke teleminaka organisation.” Yina kele luvunu. Mu ke teleminaka ve organisation. Kasi ya kele ti bambala mingi bantu ke tulaka ntima na organisation, beno me mona, mpe ba ke tulaka kivuvu ya bawu nionso na yawu na kisika kutula yawu na Klisto.

⁶ Ba ke zolaka kumona wapi mutindu ba ke kuzwa bamambeke mingi yina ba lendaka nata na organisation yina. Ntangu yayi, yina kele mbote mingi. Mu—mu . . . Yina kele mbote mingi. Mu ke banza ti organisation nionso ke zolaka kuzwa bamambeke nionso ya lendaka kuzwa. Yina kele mbote mingi. Kasi ntangu beno ke kuma na kubaka yina me balula ve ntima mpe kutula ntima mingi na yawu kulutila beno ke sala samu na Mpeve-Santu, mutindu Mpangi Rose vwandaka tuba awa na mwa ntangu fioti me luta, mpe bima nionso yina, na yina beno ke nata—beno ke nata bantu na kubanza, “Beto ke vwandaka na *yayi*, mpe beto ke vwandaka na *yina*.” Na manima ya nionso, beto nionso kele ya Nzambi. Beno me mona?

⁷ Ntangu yayi, kana mu me mona muntu mosi ke kulumuka na nzadi na kati ya masawu . . . Mpe mu ke zingaka pene-pene ya nzadi na Indiana, na Nzadi Ohio, mpe mu ke vwandaka kaka pene-pene ya ba-chute. Ya kele kisika mosi ya yimbi mingi, na ba-chute yina, samu ya ke zindisa beno na mbala mosi. Kana beno me kwenda na ba-chute yina, ya kele ve na masuwa lenda kuma yawu, samu ya kele mutindu, pene ya makulu makumi yiya to makumu tanu na nsi, mpe na yina bakuningana ya nene ke mata na zulu, na yina ya ke bula na zulu ya ditadi, na mbeto ya ditadi kuna. Mpe mu banza bifiniku, bifiniku ya mpembe, ke panzana na nsi ya ba-chute na makulu makumi yiya na zulu, beno me mona, kuna ya ke kulumuka, ya ke pumbuka diaka na zulu. Mpe na yina ya ke kubwa kaka na ngolo mutindu yina, mpe ya ke kulumuka na kati ya mbangu ya nene ya bafungula yina kele pene ya makulu makumi sambanu to makumi sambwadi na mudindu. Mpe na kati kuna kele na kimbongila yina ke balula yawu mutindu *yayi*, mpe ya ke nata yawu kuna mpe ya ke kulumuka na kanale mosi. Ya kele kaka ve na mutindu ya kuzinga, beno me mona.

⁸ Bakala mosi kwendaka awa na gilet ya sauvetage ntama mingi ve. Ba monaka kaka kima yango ntangu ya dindaka, mutindu *yayi*. [Mpangi Branham me fina misapi ya yandi—Mu.] Ata mpe gilet ya sauvetage yina, lutiliki yina ya ngolo nataka yandi na nsi. Mpe ba monaka yandi ata fioti ve. Ba zabaka ata fioti ve yina kumaka na yandi. Yandi kangamaka na zulu ya matadi to na bansongi kuna, mbala yankaka na kilometre mosi to

zole na nziunga, mutindu yina, mpe ya vwandaka ve na mutindu ya kuzinga.

⁹ Mpe kana mu me mona muntu mosi ke kulumuka na nzadi na mwa masuwa mosi ya ntama, yandi me vwanda kuna ke na kutanga, yandi ke na kukwenda, mpe mu ke boka ngolo na yandi, “Basika na masuwa yina. Masuwa yina lendaka ve kubenda balundindi yina.” Ntangu yayi, ya kele ve samu mu ke zolaka ve muntu yina, ata ti mu ke nganina yandi mpe mu ke tuba na yandi na ndinga ya ngolo. Ya kele ve ti mu ke zolaka ve muntu yina. Mu ke zolaka muntu yina, kasi mu zaba ti yandi ke panzana. Yawu yina mu ke nganina muntu yina. Samu yandi kele ve. . . Ya kele samu mu ke zolaka yandi, yawu yina—yawu yina mu ke ngana. Kana mu ke kipe ve, mu ke tuba, “Mbote, kutambula ya mbote na masuwa,” kwenda, beno me mona, kana mu ke kipe yandi ve.

¹⁰ Kasi mu ke tubaka mambu yina samu kele na kimpala ya Dibuundu. Mu—mu kele na kimpala ya Dibuundu ya Nzambi. Mpe mu—mu ke yinaka kumona Yawu kukuma na mabanza ya organisation. Mpe mu me zaba kubendama yina, yawu yina mutindu mabuundu nionso me kwenda na matadi, kaka mutindu yina, na kati ya kubendama ya organisation.

¹¹ Beno banza kaka na reveil ya ntangu ya ba-Lutherien, beno tala kisika ya me kwenda. Mpe kaka ntangu ya me bula yawu, ya ke telema ata fioti diaka ve. Ba-Luthérien me vutukaka diaka ve. Beno tala ba-Methodiste ya Wesley, ba me vutukaka na manima ata fioti ve. Beno tala ba-Pélerin de la Sainteté, ba-Nazaréen, bayankaka nionso, ba-Baptiste, ba-Presbytérien. Ba ke vwanda na reveil, mpe na yina muntu mosi ke telema na ngolo ya Nzambi na zulu ya yandi, yandi ke banda kutambula na Mpeve. Na yina ntangu muntu yina ke kwenda, na yina ba ke kota na organisation na ntangu yina.

¹² Mutindu Institut Biblique ya Moody, kisika ya mbote, kasi ya ke vwanda ata fioti ve mutindu Moody vwandaka na yawu. Beno me mona? Mpe bima yina Moody simbisaka, bawu kele na ba-million ntama na yawu, na yina beno me kuma kisika yango. Mpe ntangu yayi ya kele nionso na mambu ya lukolo, kasi Moody vwandaka na yawu na Kimpeve, beno me mona. Mpe na yina beno—beno ke mona yawu, na kati ya mambu yina.

¹³ Ntangu yayi, ntangu mu bandaka ntete, mpe mu kwisaka awa na Phoenix, na bamvula me luta, na mouvement Pentecotiste, mu vwandaka na bweso ya kubanda organisation munu mosi. Bampangi ya Mvula ya Nsuka kwisaka na munu, bawu tubaka, “Ntangu yawu yayi. Beto banda. Na yina, beto ke vwanda—vwanda nene mingi kulutila bayankaka nionso.”

¹⁴ Mu tubaka, “Matondo! Yawu yayi ve. Ya kele ve—ya kele ve diambu, bampangi. Beno kele—beno kele na ba-million ya ba-kilometre ntama—ntama na nzila. Nzambi ke sakumuna yawu ata fioti ve.” Beno tanga masolo ya beno. Beno tanga Biblia. Ya

ke vwanda ata fioti diaka ve na organisation yankaka ke basika na yawu, yina me katuka na yayi. Ya kieleka. Yayi ke bongisa mpe ya ke kota . . . Ya kele na mutindu ya Laodicée ntangu yayi. Kasi mu ke tuba na beno, bampangi, ya ke vwanda diaka ve na ba-organisation yina Nzambi ke sakumuna. Ya ke vwanda diaka ve na kima ya mutindu yayi. Beto kele na Nkwizulu ya Mfumu. Beno me mona? Mpe Nzambi ke basisa ndambu yina me bikala na mouvement oecuménique yayi ya nene, ya ke na kusalama ntangu yayi, samu na Kento ya makwela, kasi ya ke vwanda ata fioti ve na organisation mosi, na kimpeve, ata fioti diaka ve. Beno me mona? Ya me kuma na nsuka.

¹⁵ Ntangu mu ke mona bampangi ya munu ya babakala, bampangi ya munu ya ntalu, ke tengama mutindu yina, na yina mu ke panza yawu kaka kuna na nionso mu kele na yawu. Mpe bantangu yankaka bampangi ke tuba, “Mbote, Mpangi Branham ke zolaka beto ve. Beto kele . . .” Yina kele luvunu. Oh! Ya kele—ya kele ntama mingi na mabanza ya munu, kukondwa kuzola muntu bantu. Mu ke—mu ke zolaka beno. Mu kele mpangi ya beno ya bakala, beno me mona, mpe mu ke na kumeka na kusala nionso mu lendaka sala ya mbote. Mpe yawu yina mu ke kotaka ata fioti ve na organisation mosi, na yina mu lendaka telema na kati-kati mpe kutuba, “Mpangi-bakala, ve. Ya kele ve mutindu yina.”

¹⁶ Ba ke tubaka, “Beto kele na ba-Assemblée.” Yina kele mbote mingi. Ba-Assemblée de Dieu vwandaka lusakumunu ya nene samu na munu. “Beto kele bantu ya Quatre carrés.” Mbote, ba ke vwandaka lusakumunu samu na munu. “Beto kele bantu ya Nkumbu ya Yesu.” Ba ke vwandaka lusakumunu samu na munu. “Beto kele *bayayi, bayankaka.*” Nionso yina, bawu nionso ke vwandaka balusakumunu. Bawu kele—bawu kele bantu ya Nzambi. Beno me mona? Mpe bantu ya Nzambi kele na kati ya yawu nionso.

¹⁷ Mpe ntangu beto ke kota na bimvuka beto mosi, beto ke tubaka, “Beto kele kaka mwa mbote mingi awa kulutila Dibundu ya Nzambi,” beno me mona, to, “Beto kele mwa mbote mingi kulutila bantu ya Quatre carrés to bantu ya Nkumbu ya Yesu,” to kima mosi ya mutindu yina. Ntangu beto kele kaka . . . Beto fwana kuswaswana fioti na mabanza. Beto nionso me kwenda kudia madia ya midi bubu yayi, beto nionso ke baka tarte ya luswaswanu, kasi beto ke kudia tarte kaka mutindu mosi, beno me mona. Yawu yina dibanza. Na yina dibanza ya yawu, kele, kana—kana beto lendaka kumona kaka kimpangi ya beto. Na yina beto ke yekama ve na organisation. Beno yekama na Calvaire. Beno ke kufwa na bima yankaka. Beno me mona? Mpe mu ke kwikila . . .

¹⁸ Beno bika mu tuba yawu ntangu ya kele na mabanza ya munu. Mu ke kwikilaka ti organisation me sala kisalu ya mbote. Na yina na bantangu mingi, bampangi, mutindu beto ke zolaka

ve kubanza na yawu, ya kele na mambu yina vwandaka basika na kati ya beto, mpe mambu ya mutindu yina, yina me swaswanu na nsambulu. Mpe bantu ke baka kaka mambu yina me swaswana na nsambulu mpe ba ke panza bantu na mutindu nionso. Mpe kimvuka mosi ya bampangi ke vukana ti . . . ti munu . . . Yina mu ke tuba ke panzana mutindu bawu salaka na bilumbu ya ntete mpe bima nionso yina. Mpe—mpe beto kele na yawu nionso dezia bubu yayi, beno me mona, ya ke na kutambula kaka. Mpe bantu yina lendaka vukana bawu mosi kintwadi . . .

¹⁹ Kifwanisu ya kieleka ya Pentecote, samu na munu, na yina me tadila organisation, ya kele dibuundu, Mpangi Pethrus, dibuundu ya Philadelphie na Suède. Ntangu yayi, ba ke tala ve wapi mutindu ya malongi beno kele na yawu, ntangu nionso ya kele Masonuku. Kana beno ke zola kumona yawu mutindu *yayi*, mutindu *yina*, to mutindu yankaka, ntangu nionso beno kele na kimpangi mpe beno ke zinga luzingu ya busantu ya kieleka. Yawu yina. Ya kele mbote. Mpe kana beno ke zola kutuba ti Yesu ke kwisa na zulu ya mpunda ya mpembe, mpe muntu yankaka ke tuba ti Yandi ke kwisa na matuti ya mpembe, beno ke vingila Yandi mutindu yina. Beno kwenda kaka na ntwala, ntangu nionso beno ke zinga luzingu ya busantu mpe beno kele na kimpangi. Ya kele mutindu yina. Yawu yina.

²⁰ Na yina, mbote, ntangu, yawu yina, bampangi, mu ke vwandaka na kimvuka ya Bantu ya Mumbongo. Samu, mu zaba ti ya kele na bima mingi kuna yina fwana ba sungika. Kasi ya kele—ya kele ya kulutila mbote mu kele na yawu. Yinga. Ya kieleka. Yinga. Ya kele na bima mingi yina mu fwana kutuba. Mpe—mpe beno, bampangi yina kele awa ke tuba na beno, mu ke bendanaka na bawu ata fioti ve. Mu kele awa mutindu kisadi ya Nzambi, samu na kutuba Kieleka. Mpe mu fwana kupesa mvutu samu na yawu. Ya kieleka. Mpangi Rose tubaka, “Yawu yina beto ke zolaka nge.” Mbote, ti—ti, mbote, beto lendaka ve . . . Beto, beto fwana kangama na Ndinga yayi. Beno me mona?

²¹ Kaka na mwa ntangu fioti me luta, mu banza, ya vwandaka beno . . . Mu vwandaka na bayinsi ya nzenza, to kuna na kisanga na mvula me luta, mpe bawu vwandaka na lukutakanu, mpe bampangi yankaka vwandaka kukizangula na lukutakanu yayi ya nene kisika bawu vwandaka na bantu ya mumbongo, na kati ya yinsi. Mpe ba vwandaka tuba, “Mu kele na mwa kisika ya fioti kuna na nsongi. Mumbongo ya munu vwandaka mbote ve. Mpe mu vwandaka na ntangu ya mpasi. Mpe kima ya ntete beno zaba, ntangu mu—mu me ndima Klisto, mpe—mpe, oh, mu kele na bima nionso ntangu yayi.” Ntangu yayi, yina kele mbote. Beto ke sepela na yawu. Ya kele mbote, kasi ntomoso ke zola ve kutuba ntangu nionso Klisto. Na yina, beno me mona, mpe beto fwana kutala yawu. Ntangu yayi, yina kele mbote. Beno me mona? Mu . . . Mu ke na ke telemina yawu ve.

22 Kasi na manima mu bakaka bampangi na nkokila yina. Beto kwendaka kuna na motel kisika kimvuka ya beto vwandaka, mpe Mpangi Shakarian mpe beto nionso. Mpe mu tubaka, “Mbote,” mu tubaka, “bampangi, mu ke zola kutuba na beno.” Mu tubaka, “Mu—mu banza ti beno bampangi kele kimvuka ya bantu ya kulutila mbote mu me monaka ntete ve, na luzingu ya munu. Kasi,” mu tubaka, “diambu ya yawu kele,” mu tubaka . . .

23 Mu kele ya organisation mosi ve, kasi mu ke vwandaka na kimpangi yayi na yawu. Mu kele na kalati ya kimpangi na bawu, kalati mosi kaka mu kele na yawu, samu ya ke talisaka ba-organisation nionso, beno me mona. Mpe yawu yina mu ke zolaka. Yawu yina mu ke tatamana na yawu.

24 “Kasi,” mu tubaka, “kima yina ke yangisaka munu, ti beno bampangi ya babakala na ntwala ya bantu yina kuna, yina kele na ntomoso bambala mafunda kulutila beno, na yina beno ke meka na kutuba na bawu ti Klisto kele ntomoso. Beno meka ata fioti ve kuteka na bawu yawu.” Beno me mona?

25 Beto meka ata fioti ve kufwanikisa yawu na yinza. Beno bika yinza kukwisa na kisika ya beto. Beno kwenda ve na kisika ya bawu. Beno me mona? Beno me mona? Beno kwenda ve na kisika ya bawu, beto ke sema ata fioti ve na bawu. Na manima ya nionso, Nsangu ya mbote ke semaka ve; ya ke ngengaka. Hollywood ke semaka. Nsangu ya mbote ke ngengaka. Ya kele na luswaswanu mingi kati-kati ya kungenga na kusema.

26 Mpe na yina, ntangu yayi, mpe mu tubaka, “Bampangi ya ntete ya Pentecote yina vwandaka na kima mosi, ba mekaka na kukwenda ntama na yawu, mpe bawu disaka bamputu, mpe nionso yina, mpe bawu kwendaka kukondwa kima mosi, beno me mona, samu na kulonga Nsangu ya mbote, na kimvuka.” Mu tubaka, “Ntangu yayi beto ke meka na kukizangula samu bima mingi beto kele na yawu.” Mu tubaka, “Wapi luswaswanu ya ke sala!”

27 Mpe mpangi mosi ya fioti ya ntalu, na manima ya mwa ntangu fioti, yandi telemaka, yandi tubaka na munu, yandi tubaka, “Mpangi Branham, yina kele mosi ya bifu ya kulutila nene bantu ke salaka.”

28 Mpe mu tubaka, “Ntangu yayi, beno tala, bampangi, mu kele ve na dibanza ya kumeka na kutuba na bantu na kuteka yina ba kele na yawu. Kasi mu ke meka kaka na kutuba kima mosi na bantu yawu ya yina mumbongo.”

Yandi tubaka, “Yina vwandaka kifu ya kulutila nene, bantu.”

29 Mu tubaka, “Ba salaka yawu na Mpeve-Santu. Mpeve-Santu tubaka na bawu na kusala mutindu yina.” Kana Mpeve-Santu ke tuba na muntu mosi na kusala kima mosi, beno sala yina Yandi ke tuba na beno na kusala.

30 Mpe yandi tubaka, “Mbote, ya vwandaka kifu ya kulutila yimbi dibuundu me salaka.”

31 Mu tubaka, “Samu na yinki, mpangi?” Mpe kaka kuna na ntwala ya bakala yina mu vwandaka tuba.

32 Yandi tubaka, “Samu, ntangu mwa kuswana vwandaka kwisa na kati ya dibuundu kuna, ya vwandaka na luswaswanu kati-kati ya ba-Grec mpe—mpe ba-Hebreux, mpe nionso yina,” yandi tubaka, “bantu yina vwandaka ve na kisika ya kukwenda. Ba vwandaka diaka ve na yinzo ya kukwenda.”

Mu tubaka, “Yina vwandaka kieleka luzolo ya Nzambi.”

Yandi tubaka, “Wapi mutindu ya lendaka vwanda luzolo ya Nzambi?”

33 Mu tubaka, “Bawu kwendaka bisika nionso, samu na kupanza Nsangu ya mbote, samu bawu vwandaka ve na kisika ya kukwenda.”

34 Mpeve-Santu ke salaka kifu ve. Ya ke salaka yawu kaka ve. Yawu yina. Mpe mutindu mu vwandaka tuba mazono na nkokila, beno fwana kusimbama na Nzambi, mpe kusimba Ndinga ya Yandi mpe kukangama na yawu. Ya vwanda konso kisika yina Yawu ke twadisa beno, beno landila kaka na kulanda Yawu. Beno landila kaka mutindu yina.

35 Kasi ya kieleka mu ke simbisaka kimpangi yayi ya Bantu ya Mumbongo. Mpe lukutakanu nionso yina ba me bokila munu, mu ke kwendaka ntangu nionso mpe mu ke longa, mu ke tuba kima yina mu lendaka tuba. Ya kele kaka ve samu na kutuba konso kima yina, yina ke sepelisa muntu, *Kingandi*. Kasi ntangu nionso mu ke kwendaka na lukutakanu ya munu, mu ke mekaka na kulonguka mpe kusambila mpe kumanga madia, mpe mu ke tuba, “Mfumu Yesu, yinki—yinki mu lendaka tuba yina ke sadisa bantu yina.”

36 Muntu nionso me zaba ti mu kele mulongi ve. Mu kele longi ve. Mu—mu kele. . . Muntu nionso me zaba yawu. Mu kele mulongi ve. Nsangu ya munu—ya munu kele kusambila samu na bambevo, mpe nionso yina. Kasi, mu kele ve mulongi. Muntu nionso me zaba yawu, ba me kuwaka munu ke longa. Kasi yina mu ke kutuba, mu ke zola kubula musonso kuna ti ya ke sala kima mosi.

37 Ya kele ve samu na kutuba, “Yandi kele ve longi ya ngolo? Yandi ke sadilaka ve grammair ya yandi mbote? Yandi ke longaka ve mbote na chaire?” Mu ke zolaka ve yina. Mu—mu lendaka ve kusala yawu. Nzambi me bokilaka munu ata fioti ve samu na yawu.

38 Kasi mu ke mekaka na kuzwa kima yina ke sadisa muntu yina, mpe ti dibuundu kuvwanda dibuundu ya kulutila mbote, kusadisa yawu na kuvwanda bantu ya kulutila mbote, kusambila samu na yawu.

³⁹ Ntangu yayi, mu vwandaka tuba mu banza samu mu me mona mwa bantu fioti ke na kuvukana kaka, mpe ntangu mvula ke na kunoka. Yawu yina mu vwandaka tuba bima yayi. Ntangu yayi, minuti kumi na tanu me luta.

⁴⁰ Mpe ntangu yayi mu ke zola kuvutula matondo na mpangi-bakala. Mu me zaba Mpangi Fuller kubanda ntama, mu ke zolaka yandi ntangu nionso, na kati ya ntima ya munu. Mpe beto ke vwandaka na bima mingi kintwadi, Mpangi Fuller. Mpe na yina beto. . . Mu me monaka Mpangi Fuller bamvula mingi me luta ntangu yayi, mpe mu me zaba ti yandi kele muntu ya kieleka ya Nzambi, mpe mu ke zolaka yandi. Mpe mu kele awa na suka yayi samu na kimpangi. Mu ke na kiadi ti mu me kondwa na nkokila ya yandi mutindu ba zabisaka yawu na kisika yayi awa, kasi ya vwandaka kima yina mu lendaka ve kukangila ntima. Mpe mu ke na kiese na kuvwanda awa na suka yayi, kumona dibuundu ya yandi, ya kitoko, mutindu Nzambi me tombola bawu mpe me sakumuna bawu. Mpe—mpe bima nionso yina Yandi me sala samu na yandi, ya kieleka mu ke sepela na yawu. Bika Nzambi kulandila na kusakumuna yandi, mpe kusakumuna tabernacle yayi, mpe—mpe—mpe conseil ya ba-administrateur, ba-diacre, mpe bamambebe nionso ya dibuundu. Mpe bika ti beno kukula mpe beno kukwenda na ntwala na lemvo ya Mfumu, ya kele kisambu ya munu ya kukikulumusa.

⁴¹ Ntangu yayi, na ntwala beto ke belama na Ndinga, beto belama na Nsoniki, ntete. Beto kulumusa bayintu ya beto na mwa ntangu fioti samu na kisambu.

⁴² Mutindu beto me vwanda na luzitu ntangu yayi na Mvwandulu ya Nzambi, na bayintu ya beto mpe bantima ya beto ya kukikulumusa, ya kele na lombilu mosi na kati ya ntima ya beno, kima yina beno kele na yawu nsatu, yina beno ke zola ti Mfumu kupesa beno, ti mu lendaka kubambuka moyo na beno na kisambu ya munu awa na suka yayi na yinzo-Nzambi? Beno ke zola kaka kutalisa yawu na kutelemisaka diboko ya beno? Beno tula yawu kaka na mabanza ya beno, yina ya kele. Mfumu kupesa beno nionso lombilu ya beno.

⁴³ Tata Nzambi yina me fuluka na lemvo mpe busantu, Yina vangaka bima nionso na nzila ya Klisto Yesu, samu na nkembo ya Yandi, beto me kwisa na Mvwandulu ya Nge na suka yayi na kuvutulaka matondo na ntima ya beto. Mpe mutindu beto me kwisa na kati ya mvula, mpe mupepe ke na kubula, mvula ke na kunoka, beto ke sambila, Tata ya Mazulu, ti Nge ke tiamuna mvula ya Mazulu na zulu ya beto, mvula ya kimpeve, mvula ya nsuka mpe mvula ya ntete, kintwadi, na kati ya bantima ya beto bubu yayi.

⁴⁴ Beto ke sambila, Tata, ti Nge ke sakumuna dibuundu yayi. Beto ke vutula matondo mingi samu na yawu, samu na pasteur ya yawu, samu na dibuundu ya yawu, samu . . . kisika yina bantu

lendaka kukutana na muludi na zulu ya bayintu ya bawu mpe bisika ya kitoko ya kuvwanda na kati.

⁴⁵ Beto ke vutuka na mabanza ya beto na disolo ya Dibuundu yayi ya ntete, yayi ya ntete, Dibuundu ya catholique, ya bantumwa, mpe beto ke mona wapi mutindu bawu vwandaka vwanda na zulu ya ba-dalle ya matadi to konso kima yina bawu lendaka, samu na kuwa Ndinga ya Nzambi, na yina ba vwandaka fukama na ntoto, mpe ya vwandaka na madidi mpe matadi mpe mvindu, mpe kuna ba vwandaka telemisa maboko ya bawu na Zulu mpe vwandaka sepela na Mvwandulu ya Mpeve-Santu. Pesa na bawu kutatamana yina na luzingu ya bawu ti ba ke tambula na kati ya dibulu ya bankosi, ti ba ke ningana ata fioti ve, kasi ba ke seka na kizizi ya bawu, na kutalaka na Zulu, na kuzabaka ti, na mwa ntangu fioti, ba ke vwanda na Mvwandulu ya Yandi Yina ba ke zolaka.

⁴⁶ Oh, lukwikilu ya batata ya beto, ke na kuzinga diaka, ata ti ya kele na kivingi ya mudidi, tiya mpe mbele. Vutula na kati ya beto, O Mfumu, lukwikilu ya mutindu yina. Pesa beto lusakumunu ya nene ya bantumwa ya Mpeve-Santu.

⁴⁷ Bantu nionso bubu yayi yina me telemisa maboko ya bawu, Nge zaba yina bawu kele na yawu nsatu, Mfumu. Nge zaba yina kele na manima ya diboko yina, yinki motifi mpe lukanu yina kele na kati ya ntima yina. Nge kaka lendaka kupesa bansatu nionso, Mfumu. Mpe mu ke sambila samu na bawu, kukondwa kuzaba bansatu ya bawu, kasi mu ke pesa kisambu ya munu mutindu lombilu samu na bawu. Mutindu kisadi ya Nge, mu ke sambila kieleka samu na bawu nionso, ti, nionso yina ba me lomba, bika ti bawu kuzwa yawu. Sakumuna bawu, Tata.

⁴⁸ Mpe ntangu yayi mutindu beto ke tanga na Ndinga ya Nge, mpe kulonga na kalasi yayi ya lukolo ya Lumingu, mutindu ya vwandaka, na suka yayi, Mu ke sambila ti Nge ke baka Bandinga yayi mpe Nge ke katula kukondwa lukwikilu nionso na bawu, Mfumu; ti, ngolo nionso ya Satana ke katuka tii na nzika, yina ke pekisa Yawu na kukula. Bika ti kukota na kati ya bantima nionso, mpe kuma yawu kukuma bayinti yina ke butaka bambuma ya bumbote, Mfumu. Lukwikilu, kubuta yina Nge tumaka Ndinga ya Nge na kusala, na kutubaka, “Ya ke vutuka ve na Munu ya mpamba, kasi ya ke sala kisalu yina Yawu fwana kusala.”

⁴⁹ Ntangu yayi, Mfumu, santisa kisadi ya Nge. Ndinga ya Nge kele ya kusantisama dezia. Mpe, kintwadi, bika ti beto kuvwanda na kiyeka ya kudisa dikábu yina Mpeve-Santu pesaka beto na kutwadisa. Beto ke lomba yawu na Nkumbu ya Yesu. Amen.

⁵⁰ Ntangu yayi, samu na beno yina ke zolaka kutanga ntangu nionso, kintwadi na Nsangu, mu ke zola. . . Mu ke lomba beno, kana beno lendaka zibula Buku. Mpe mu kele kaka na mwa

Nsangu ya fioti ya lukolo ya Lumingu, mutindu yayi, samu na bantu na suka yayi.

⁵¹ Beno lendaka kuwa munu mbote, bisika nionso, bisika nionso kuna? Mu me katula microphone yayi. Mu kele fioti na ndinga ya kukangama. Munu, ntangu mu me kwenda kuna, mu me baka grippe. Diabulu salaka nionso samu na kupekisa munu na kuvwanda awa. Mu zaba ve. Mu ke kwikila ti Nzambi kieleka ke mwangisa kima mosi ya nene na zulu ya lukutakanu yayi na ntangu yayi, samu Satana me sala nionso yandi lendaka samu na kupekisa munu na yawu.

⁵² Kasi ntangu yayi beto ke tanga kuna na Genèse, kapu ya 22. Mpe beno yina ke zola kuzibula Biblia ya beno, beto tanga mwa kitini ya Yawu, kintwadi. Genèse 22, beto banda na nzila ya 9.

Mpe ba kumaka na kisika yina Nzambi tubaka na bawu; mpe Abraham tungaka autel kuna, mpe yandi tulaka nkuni na ndonga, mpe yandi kangaka mwana ya yandi bansinga, mpe yandi tulaka yandi na zulu ya autel na zulu ya nkuni.

Mpe Abraham tandaka diboko ya yandi, mpe yandi bakaka mbele samu na kufwa mwana ya yandi.

Mpe wanzio ya MFUMU bokilaka yandi na mazulu, mpe tubaka, Abraham, Abraham: mpe yandi tubaka, Munu yandi yayi.

Mpe yandi tubaka, Kutula ve diboko ya nge na zulu ya mwana yayi ya bakala, to kusala yandi kima mosi ve: samu ntangu yayi mu me zaba ti nge ke bangaka Nzambi, mu me mona ti nge me manga ve na kupesa munu mwana ya nge, mosi kaka.

Mpe Abraham telemisaka meso ya yandi na zulu, mpe yandi talaka, mpe tala na manima ya yandi vwandaka dimeme ya bakala ya kukangama na kati ya bansende na bibongo ya yandi, to na bibongo ya yandi, mu zolaka kutuba: mpe Abraham kwendaka mpe bakaka dimeme yango ya bakala, mpe pesaka yandi na zulu. . .kuna mutindu dikabu ya kuyoka na kisika ya mwana ya yandi ya bakala.

Mpe Abraham bokilaka kisika yina Yehowa-yile: mutindu ba ke tubaka yawu bubu yayi, Na mongo ya MFUMU ya ke monana.

Mpe wanzio ya MFUMU bokilaka Abraham kuna na zulu na mbala ya zole,

Mpe tubaka, Munu me sila Na munu mosi, tubaka MFUMU, . . . samu nge me sala diambu yayi, mpe nge me manga ve na kupesa mwana ya nge, mwana ya nge mosi kaka:

Na yina mu ke sakumuna nge, mpe mu ke bidika nge bankuna ya nge mutindu bambwetele ya . . . zulu, mpe mutindu bazelo . . . na zulu ya kumu ya mubu; mpe nkuna ya nge ke baka mwelo ya mbeni ya yandi;

⁵³ Mu ke zola kubaka falaze yina ya nsuka kuna samu na dilongi: *Mpe Nkuna Ya Nge Ke Baka Mwelo Ya Mbeni Ya Yandi*. Yina kele nsilulu ya kitoko.

⁵⁴ Ntangu yayi, beto nionso me zaba disolo yayi, ya Abraham, mu banza beto me tangaka yawu mingi, mingi, mbala na mbala, mpe wapi mutindu Nzambi bokilaka yandi kuna na yinsi ya yandi, mpe wapi mutindu yandi vwandaka kaka muntu mutindu bantu nionso, yandi vwandaka ya kuswaswana ve. Kasi Nzambi bokilaka yandi mpe pesaka yandi nsilulu.

⁵⁵ Ntangu yayi, mu ke zola beno kuzaba ti nsilulu yayi Nzambi pesaka na Abraham vwandaka kaka ve samu na Abraham, kasi ya vwandaka samu na nkuna ya yandi na manima ya yandi. Ntangu yayi, bantu mingi ke tubaka, “Oh, kana mu vwandaka mutindu Abraham, kana mu zolaka vwanda na kisika yina Nzambi me tuba na munu mpe—mpe me kindisa munu mutindu Yandi salaka na Abraham, na yina mu zolaka vwanda na yawu. Mu—mu zolaka vwanda kieleka na lukwikilu, Mpangi Branham, kana mu zolaka vwanda na yawu, kana Nzambi tubaka na munu mutindu Yandi salaka na Abraham.” Kasi beno kele na nsilulu mosi yina Abraham vwandaka na yawu, na yina, kana beno kele Nkuna ya Abraham.

⁵⁶ Na yina beno ke tuba, “Kasi, Mpangi Branham, mu kele Muntu ya makanda. Mu lendaka ve kuvwanda nkuna ya Abraham.”

⁵⁷ Nkuna ya Abraham vwandaka ve nkuna ya kimuntu. Ya vwandaka Nkuna ya kimpeve, samu nzengolo ya yawu vwandaka kima mosi ve. Nsilulu, Yandi pesaka yandi mpe na ntwala ya nzengolo. Kasi ba pesaka yawu na Abraham na ntwala ya nzengolo, mpe ya vwandaka ve samu yandi lutaka na nzengolo mpe yandi vwandaka na ngwisani na Nzambi mutindu yina. Ya kele samu ti Abraham kwikilaka Nzambi.

⁵⁸ Mpe Masonuku me tuba, ti, “Ntangu beto me kufwa kati na Klisto, beto me kuma Nkuna ya Abraham.” Paul me tuba yawu, “Mpe na yina Juif kele ve juif ya nganda, kasi Juif na kati.” Na yina, kana beno me butuka na Mpeve ya Nzambi, “beno kele Nkuna ya Abraham, mpe beno kele bilandi na Abraham landila nsilulu.” Beno me mona? Na yina nsilulu nionso yina Nzambi pesaka Abraham kele ya beno, samu na kimpeve beno kele Nkuna ya Abraham.

⁵⁹ Mpe beno kele kulutila Juif ti beno zolaka vwanda kana beno butukaka na menga ya ba-Juif, na yina—na yina beno ke vwanda Juif orthodoxe na kati ya dibuundu yina, mpe beno ke manga Mpeve—Santu yayi ya ntalu mpe Mfumu Yesu Klisto. Beno

me mona? Beno kele kulutila Juif, samu beno kele Juif yina me butuka na nsilulu ya Mazulu, yina Nzambi pesaka Abraham, mpe Abraham ndimaka yawu na lukwikilu, mpe yawu yina salaka yandi yina yandi vwandaka. Na manima ya nionso, Juif kele kaka kukabwana, mpe ya me zabuka kuna, Hebreux, mpe bima nionso yina.

⁶⁰ Ntangu yayi, kasi ntangu beno me kabwana na bima ya yinza, beno me zabuka ndilulu yina ya kukabwana, mpe beno ke zinga na yinsi ya nzenza, yinsi yina beno me vwandaka ve, na mbandukulu, na bantu yina beno me vukanaka ata fioti ve na mbandukulu, na yina beno me kuma Juif ya kimpeve. Samu, mutindu mosi Abraham, na nzila ya lukwikilu, bikaka yinsi ya yandi, yandi bikaka bantu ya yandi, yandi kwandaka na yinsi ya nzenza na bantu ya nzenza. Beno me bikaka bantu ya beno, beno me bika yinza na manima ya beno, beno me bika na manima bamfinangani ya beno, beno me zabuka kuna, na Menga ya Yesu Klisto, mpe beno me kuma bizieti, yina ke na kusosa Mbanza Yina Mutungi mpe Kiyidiki kele Nzambi, mutindu Abraham vwandaka. Bizieti, kintwadi na Yandi, samu na kuzinga na batenta, na mabuundu, samu na kulanda bisu-ntoto ya Kimfumu ya Mazulu, bilandi ya bima nionso na nzila ya Yesu Klisto. Beno me mona? Beto me zabuka, beto me kabwana.

⁶¹ Ntangu yayi, Abraham, ba pesaka nsilulu na Abraham mpe na Nkuna ya yandi na manima ya yandi. Ntangu yayi, Nzambi pesaka nsilulu yayi na Abraham, na Nkuna ya yandi, samu na kubaka mwelo ya mbeni ya yandi na manima yandi mekaka Abraham, Yandi mekaka Abraham. Ntangu yayi, na manima kumekama kwisaka, na yina . . .

⁶² Abraham balulaka ntete ntima, beto ke bokila yawu, yandi katukaka na bumpani yandi kotaka na Nzambi. Mpe na yina Nzambi pesaka yandi, mutindu kidimbu ya Mpeve-Santu, nzengolo. Na yina, na manima ya nzengolo, na manima kwisaka ntangu ya kumekama.

⁶³ Yayi kele kifwanisu ya kitoko ya Dibuundu, ti, na manima beto me kuzwa mpulusu, na yina ba ke pesa beto kidimbu ya nzengolo, yina kele ve ya nzutu, kasi ya Mpeve. Mpe Mpeve-Santu kele nzengolo ya beto. Ya kele mbele ya meno ya Nzambi. Ya ke kabulaka mpe ke zengaka nsuni ya kulutila, ya yinza, na beto. Ndinga ya Nzambi, kele meno mingi kulutila mbele ya meno zole! Na yina, beno me mona, beno ke vutuka diaka. Ndinga ya Nzambi kele kima yina Mpeve-Santu ke sadilaka; ba-credo ve, ba-denomination ve. Kasi Ndinga kele yina ke kabulaka beto na bima ya yinza. Ya ke zengaka mabanza ya beto mpe bima, mpe ke pesa beto ya muvimba na Nzambi.

⁶⁴ Yesu tubaka, “Kana beno ke zinga na kati ya Munu, mpe Ndinga ya Munu na kati ya beno.” Yawu yina. Na yina, ya kele ve ndinga ya beno. Ya kele Ndinga ya Yandi. Na yina, beno me

mona, “Kana beno ke zinga na kati ya Munu, mpe Ndinga ya Munu ke zinga na kati ya beno, beno lendaka lomba yina beno me zola.” Uh-huh. Beno me mona? Yinki ya kele, beno ke na kutuba ve ndinga ya beno mosi. Beno ke na kutuba Ndinga ya Yandi.

⁶⁵ Na yina Mpeve-Santu kele Mosi yina ke bakaka Ndinga ya Nzambi mpe ke kabulaka beto na bima ya yinza, beno me mona, nzengolo, kuzenga. Na yina beno ke luta na ntangu ya kumekama.

⁶⁶ Ntangu yayi, Abraham, na manima ba bokilaka yandi kuna, na yinsi ya Chaldée, mbanza ya Ur, yandi kumaka kizieti, nzenza. Mpe na yina Nzambi bokilaka yandi, na manima yandi talisaka ti yandi ke kwenda kuna mpe yandi ke baka Nzambi na Ndinga ya Yandi. Na yina, yina Nzambi salaka na ntangu yina, Yandi pesaka yandi kidimbu, ti Yandi me ndima yandi, mpe Yandi me kuzenga yandi. Mpe yandi salaka nzengolo na Ismael mpe bayina nionso vwandaka na yinzo ya yandi.

⁶⁷ Mpe ntangu yayi beno me mona, ntangu—ntangu ba me bokilaka beno kuna, ntete beno ke luta na kumekama, samu na kutala kana ya kieleka beno ke kwenda na ntwala. Na yina Nzambi ke pesa beno Mpeve-Santu, na yina ya kele kidimbu ti Yandi me ndima lukwikilu ya beno yina beno ke tuba ti beno kele na yawu kati na Yandi. Beno ke landa munu ntangu yayi? Yandi ke ndima yawu.

⁶⁸ Ntangu yayi, mu vwandaka tuba na . . . Mu banza na mwa bampangi ya ba-Baptiste yina kele ya kuvwanda awa. Mpe muntu nionso me zaba ti mu me katukaka na dibuundu ya ba-Baptiste. Mu vwandaka tuba na mpangi ya munu ya Baptiste. Mpe yandi tubaka na munu, “Mpangi Branham?” Yandi vwandaka Docteur na Théologie, bakala mosi ya mbote, Muklisto ya kieleka. Yandi tubaka, “Kasi, Mpangi Branham, wapi kisika nge me mona ti mbotika ya Mpeve-Santu kele ya kuswaswana na lukwikilu kati na Klisto Yesu?”

Mu tubaka, “Ya kele ya kuswaswana, mpangi ya munu ya bakala ya ntalu.”

⁶⁹ Yandi tubaka, “Nge ke banza ve ti ntangu nge me ndima Klisto, nge ke baka Mpeve-Santu?”

⁷⁰ Mu tubaka, “Ya kieleka. Kasi,” mu tubaka, “beno me mona, beno ke tuba kaka ti beno me ndima Klisto, tii kuna Yandi ke kundima yawu.”

⁷¹ Yandi tubaka, “Mpangi Branham, Abraham kwikilaka na Nzambi, mpe ba tangilaka yandi yawu samu na ludedomo.”

⁷² Mu tubaka, “Yinga. Kasi Nzambi pesaka yandi kidimbu, ti Yandi me ndima lukwikilu ya yandi, ntangu Yandi pesaka yandi kidimbu ya nzengolo, ti Yandi me ndima lukwikilu ya yandi.” Amen.

⁷³ Ntangu yayi, ntangu beto me ndima Klisto mutindu Mvulusi ya beto, na yina, kana beto kele ya kuvedila na yawu, na yina Nzambi ke pesa beto kidimbu, ti Yandi me ndima lukwikilu ya beto kati na Klisto, na kupesaka beto kidimbu ya nzengolo, yina kele Mpeve-Santu. Yawu yina kele kidimbu ya nzengolo. “Beno niongisa ve Mpeve-Santu ya Nzambi na nzila ya yawu beno me kuzwa kidimbu tii na Kilumbu ya Mpulusu ya beno.” Ya kele ve tii na lukutakanu yina ke kwisa; kasi tii na Kilumbu ya Mpulusu ya beno. Ya kele, Ephésiens 4:30. Ntangu yayi, yawu yina mutindu beto ke kuzwaka Mpeve-Santu.

⁷⁴ Ntangu yayi, kana beno ke tuba, “Oh, mu kele mukwikidi,” mpe Nzambi me pesa beno ntete ve Mpeve-Santu, Yandi me ndima yawu ata fioti ve. Beno ke na kutuba kaka ti beno ke kwikila. Kasi ntangu bantembe nionso. . . Mu ke tuba ve ti beno kele ve mukwikidi ntangu yayi. Na lweka mosi, beno kele mukwikidi.

⁷⁵ Kasi ntangu Nzambi me kuzwa lemvo, beno me kuzwa lemvo na Yandi, na yina, mpe Yandi me ndima ti beno kele mwana ya Yandi, mpe Yandi me zaba ntima ya beno, mpe Yandi ke monaka kuvedila ya beno, Yandi me zaba ti bima nionso me zengana na beno. Na yina Yandi ke tula beno kidimbu na kati ya Kimfumu ya Nzambi, na nzila ya Mpeve-Santu, samu na kotalisa na yinza ti Yandi me ndima lukwikilu yina beno ke tuba ti beno kele na yawu kati na Yandi. Beno me bakula yawu ntangu yayi?

⁷⁶ Ntangu yayi, na mbala mosi na manima ya yina, mpukumunu ke kwisa. “Mwana nionso yina ke kwisa na Nzambi ba fwana kusemba yandi, kumeka yandi.”

⁷⁷ Yesu, ntangu Yandi kuzwaka muvimba ya Mpeve, kuna na nzadi, ntangu Jean botikaka Yandi, na mbala mosi diabulu nataka Yandi na ntoto ya kuyuma, samu na kuluta na ntangu ya mpukumunu. Kasi ntangu Yandi bakaka Ndinga ya Nzambi mpe Yandi nungaka diabulu, “Ya kele ya kusonika. Ya kele ya kusonika,” Yandi vutukaka na yina ya kukubama samu na ministere ya Yandi.

⁷⁸ Mpe ya kele mutindu yina Nzambi salaka na Abraham. Ntangu yayi, Nzambi, na manima ya kubokila yandi kuna na yinsi ya yandi, mpe yandi kabulaka yandi na yinsi ya yandi, na bantu ya yandi, na yina Nzambi pesaka yandi kidimbu ya nzengolo, na yina Yandi pesaka yandi mwana ya bakala. Na manima yandi lutaka na kumekama ya nsuka, na ntangu yina yandi zolaka kupesa mwana ya yandi Isaac samu na munkayulu. Mpe Yandi tubaka, “Mu me mona ti nge me manga ve na kupesa mwana ya nge mosi kaka, Mu me zaba ti nge ke zolaka Munu.” Yandi pesaka yandi kumekama yina.

⁷⁹ Na yina na mbala mosi na manima ya yina, yandi nungaka bitumba na ntangu yina, Yandi tubaka, “Mpe Nkuna ya nge ke baka mwelo ya mbeni ya yandi.” Amen. Mu ke zolaka yawu.

“Yandi ke baka mwelo ya mbeni ya yandi.” Beto ke kuma na kitini yina ya nsuka na mwa ntangu fioti, kana Mfumu kuzola. Ntangu yayi Yandi monaka ti, Abraham vwandaka na lukwikilu. Na manima Yandi monaka ti Abraham vwandaka na lukwikilu, na yina Yandi pesaka yandi nsilulu ya kubaka mwelo ya mbeni.

⁸⁰ Ntangu yayi kuna, bambala mingi, ya kele kisika yina mingi na kati ya beto ba-Pentecotiste me salaka kifu, mpe mu banza, “Mbote, Mpeve-Santu me tiamuka na zulu ya munu. Nkembo na Nzambi! Ya kele nionso mu fwana vwanda na yawu.” Ve, tata. Beno me banda kaka na ntangu yina. Beno, ya kele ve na ntangu yina. Ya kele kumekama ya beno mpe kutesa ya beno.

⁸¹ Kaka mutindu beto me mona kuna na—na, kuna na Ngwisani ya Ntama; kumekama, kutesa, mpe na manima kutula mwana na kisika ya yandi. Lukumu ya bana, kutula mwana na kisika ya yandi na manima yandi kele ntete mwana, yina me butuka na kati ya dibuta. Yandi kele mwana, na yina ba ke meka yandi mpe ba ke tesa yandi, mpe ba ke sansa yandi na milongi, mpe kutala wapi mutindu yandi ke basika. Mpe na yina ba ke tula yandi na kisika ya mutindu mosi, kaka, na tata ya yandi.

⁸² Ntangu yayi ya kele mutindu yina bubu yayi. Beto me kuzwa pene ya bamvula makumi yiya ya kumakama ya Pentecote, to kulutula, beno me mona, kumekama ya dibuundu, samu na kutala ti ba ke telema ngwi, to ve. Kutala yina beno. . . Mpe, beno me mona, ya kele kisika yina mu ke kuzwa yawu diaka. Na kisika ya kukangama na kulunsi mpe na Ndinga, mpe kukwenda na ntwala, beto me kuma ya kuyidika landila yinza, ya kubwa *mutindu* yayi, to ya kubwa mutindu *yayi*, to na mutindu *yina*.

⁸³ Mutindu mu ke teleminaka ngolo mingi bantu yayi kele na kati ya kubendama ya mambu ya bilumbu yayi, bakento ke na kuzenga bansuki ya bawu, mpe—mpe babakala ke na kulandila mpe nionso yina, mpe ba ke lwata bilele ya mansoni mpe bima nionso yina. Mu me kuzwa masawula mingi samu na yawu. Kasi yinki ya kele? Ya ke meka na kuvulusa dibuundu yina. Ya ke meka na kutala bawu na zulu *awa*, na Ndinga ya Nzambi, kukondwa kutala yina bantu yankaka fwana tuba samu na Yawu. Beno kangama na Ndinga ya Nzambi. Amen. Beno me mona? Beno me mona?

⁸⁴ Diambu kele ti, mutindu mu vwandaka tuba mazono na nkokila, ba-Pentecotiste ke na kuingila mupepe ya ngolo, kasi ba me zimbana na kuwa Ndinga yina ya fioti ya pima. Beno me mona? Ti, ya kele yimbi na kusala mambu yayi. Ba ke banza, “Ntangu mupepe ya ngolo ke bula, mbote mingi.”

⁸⁵ Kasi yina bendaka ve bukebi ya profete. Mupepe ya ngolo kuyangisaka ata fioti ve profete Elie na kati ya cave. Banzasi ya ngolo mpe bansemo, mpe vwandaka kubwa, ya bendaka bukebi ya yandi, ata fioti ve. Kasi yina yitukisaka yandi vwandaka ndinga yina ya fioti ya pima, ti kima mosi vwandaka tuba kuna

na kati. “Ndinga ya Munu kele Kieleka. Bika ti ndinga nionso ya muntu kuvwanda luvunu, mpe ya Munu kuvwanda kieleka.” Yawu yina bendaka bukebi ya profete. Beno me mona?

⁸⁶ Mpe ya ke salaka yawu kaka. Ndinga ya Nzambi ke bendaka ntangu nioso mabanza yina ya kimpeve, samu ya kele mabanza ya Klisto na kati ya beno, yina me zaba ti Ndinga yayi kele kieleka.

⁸⁷ Mpe beno ke luta na ntangu ya kumekama. Dibuundu ke luta na ntangu ya kumekama. Muntu nionso ke luta na ntangu ya kumekama na ntwala yandi ke baka mwelo ya mbeni. Abraham lutaka na yawu. Klisto lutaka na yawu. Na manima Klisto fulukaka na Mpeve-Santu, kuna na nzadi ya Jourdain, Yandi lutaka na ntangu ya kumekama. Na manima ba bokilaka Abraham kuna, ba nataka yandi na yinsi ya yandi kisika yandi zolaka kuvwanda kizieti, na yina ba pesaka yandi nzengolo, mpe Nzambi kutanaka na yandi, mbala na mbala, kasi yandi zolaka kuluta na ntangu ya kumekama. nkuna nionso ya Abraham ke sala mutindu mosi, Abraham mpe Nkuna ya Yandi.

⁸⁸ Organisation, dibuundu, yawu yina beto ke mona ba-organisation ya beto me kubwa na lweka ya nzila, ya kele samu ya kuma na kumekama. Wapi kumekama? Ndinga ya Nzambi. Ya kele kumekama. Ndinga ya Nzambi kele kumekama. Beno ke sala yina nkonga ya bantu ke tuba na beno na kusala, to beno ke sala yina Nzambi me tuba na kusala? Yawu yina luswaswanu.

⁸⁹ Tala ya me kwisa, bilumbu ya Dwight Moody, bilumbu ya Finney, Sankey, Knox, Calvin, Spurgeon, bayankaka nionso, bantu yina ya kimpeve, ba-organisation me landa bawu. Bawu me kuzwa kuna nkonga ya bantu yina ke na kupanza nzila ya bawu kuna, bawu nionso ke kwikila *yayi* mpe *yina*, mpe ba ke yika fioti *awa*, mpe ba ke katula fioti *kuna*, ba ke yika fioti *kuna*, tii na nsuka ba ke sala organisation na yawu.

⁹⁰ Mpe ntangu ba ke sala yawu, mukwikidi ya kieleka, Nzambi ke kwisa kuna mpe Yandi ke baka mwa muntu mosi ya fioti, ya kukikulumusya, ya ke buka kima yina na bitini. Ya kieleka. Yandi ke salaka yawu ntangu nionso. Nzambi ke sobaka ve. Yandi ke pasula kima yina na bitini, mwa bantu ya kimpeve ke bikala na Ndinga yayi.

⁹¹ Beno bika mu tuba na beno. Mu kele na mwa mukanda mosi na yinzo, ya mosi ya mabuundu ya kulutila kitoko, ya ba-organisation ya nene ya mouvement pentecotiste. Kento yina ya mputu na ntima mpasi sonikilaka munu mukanda. Mpe yandi tubaka, “Mpangi Branham, mu vwandaka na bansuki ya yinda mpe mu vwandaka na nwani na manima ya yintu ya munu.” Yandi tubaka, “Mpe. . . Bakala ya munu vwandaka zola yawu.” Mpe yandi tubaka, “Beto katukaka na mbanza yina beto vwandaka na dibuundu yina vwandaka kieleka ya kimpeve, na kati ya dibuundu yayi ya nene, dibuundu ya ntete ya mbanza.”

Mpe yandi tubaka, “Ntangu beto kumaka kuna, bampangi nionso ya bakento ya ba-Pentecotiste vwandaka na bansuki ya kuzenga.” Mpe yandi tubaka, “Ba bandaka na kulandila munu samu na yawu. Mu tubaka, ‘Ve, ve. Mu ke kwikila ti Biblia me tuba na beto ve na kusala yawu; ya kele kukondwa luzitu na kusala yawu.’” Mpe na yina yandi tubaka kaka, “Mpe ba vwandaka landila kaka. . . Ba vwandaka seka yandi, ba vwandaka tuba, ‘Hé, piné ya nge—ya nge ke mana mupepe na manima, piné ya beno ya nsobisa,’ mpe nionso mutindu yina. Mpe na manima bakala ya munu, na yina, yandi tumaka munu na ngolo na kuzenga bansuki ya munu.” Mpe yandi tubaka, “Kubanda ntangu yina mu kele na mpasi na ntima.”

⁹² Beno banza na yawu, dibuundu ya ba-Pentecotiste yina zolaka telama samu na Ndinga ya Nzambi! Ya kele kisika yina organisation ya beno me nata beno. Ya kieleka. Ba ke zimbana na kuwa Ndinga yina ya Nzambi ya fioti ya pima, yina ke bokila bawu na kieleka. Bawu nionso ke kuvingila na kuwa mupepe ya ngolo, mpe makelele mingi mpe makinu, na kutubaka ti bawu kele na ngolo. Yina kele mbote mingi. Mu ke kwikilaka yawu, mpe. Kasi, mpangi-bakala, ntangu beno lendaka kukina mpe kuboka, mpe na manima kubaluka mpe kumanga Ndinga ya Nzambi, mpe kuzinga mutindu yinza, ya kele na kima mosi ke tambula mbote ve kisika mosi kuna. Ya kieleka.

⁹³ Mpeve ya Nzambi ke kulumuka, Ndinga yina ya fioti ya pima, mpe ke twadisa beno kaka na Calvaire, kisika beto me kufwaka, mpe luzingu ya beto me bumbama kati na Nzambi na nzila ya Klisto, mpe ba me tula beto kidimbu na nzila ya Mpeve-Santu. Na yina, Ndinga yayi kaka ke zinga kuna. “Na yina kana beno ke zinga na kati ya Munu, mpe Ndinga ya Munu ke zinga na kati ya beno, beno lomba nionso yina mpe beno ke kuzwa yawu.” Yawu yina luswaswanu.

⁹⁴ Mu tula kivuvu ti mu ke monana ve na ntwala ya beno mutindu fanatiki. Kana mu kele mutindu yina, mu me—mu me—mu me zaba yawu ve. Mu—mu ke kwikila ti Ndinga ya Nzambi kele Kieleka, mpe Yawu fwana zinga kaka awa. Mpe kana Yawu ke zinga awa, Yawu ke kukitalisa Yawu mosi pwelele. Ya fwana sala yawu! Luzingu ya beno, ke vwanda ya kuswaswana.

⁹⁵ Na yina ntangu Nzambi Abraham kumekama, yandi lutaka yawu, nkama na zulu ya nkama. Mpe zolaka. . .

⁹⁶ Nzambi lendaka ve kupesa organisation kumekama, samu nionso kele ya kuvukisa. Nzambi ke salaka mutindu yina na organisation. Yandi ke salaka ve na bayinsi na dikanda ya Bantu ya makanda. “Yandi me basisa bantu na kati ya Bantu ya makanda.” Israel, Yandi bakaka yinsi mosi. Kasi, na Bantu ya makanda, “Yandi basisaka bantu na kati ya Bantu ya makanda samu na zola ya Nkumbu ya Yandi.” Na yina, beno me mona, ya

kele ve organ-. . . Ya kele ve organisation. Ya kele muntu Yandi ke basisa na kati ya Bantu ya makanda.

⁹⁷ Mpe ntangu kumekama ke kwisa, beno me mona yinki ke salama? Beto me basika samu na kunungisama. Beto me ndima mbotika ya Mpeve-Santu na kati ya mouvement ya ba-Pentecotiste. Kasi ntangu ya me kuma ntangu ya kumekama, ba ke baka bantu ya mayele mingi, ba ke zola kuvwanda mutindu yinza, kaka mutindu ya vwandaka na bilumbu ya mouvement ya Wesley mpe bayankaka nionso. Ba ke kwenda na lukolo. Ba—ba ke longuka science. Mpe ba ke longuka bima yayi nionso yankaka ke tambula na malongi ya lukolo. Mpe ba ke meka na kulongoka psychologie. “Kaka kima ya kulutula mbote, mbote, kutuba ve mutindu *yayi*. Beno bika bawu sala *yayi* mpe *yina*. Samu ya ke. . .” Beno me mona, beno ke kukutika mpe beno ke na kutunga. Lukanu ya beno—ya beno—ya beno kele ya yimbi. Mutifi ya beno kele ya yimbi. Beno ke na kutunga na organisation kisika kutunga na Calvaire. Wapi mutindu beno lendaka tunga na Calvaire, kukondwa kuluta na nzila ya Ndinga?

⁹⁸ “Samu beto me sukwama na masa ya Ndinga.” “Kana beno ke zinga na kati ya Munu mpe Bandinga ya Munu ke zinga na kati ya beno, na yina beno lomba yina beno me zola.”

⁹⁹ Ya kele kisika yina beto ke mona kubwa ya mouvement ya ba-Pentecotiste, samu ba me kwenda ntama na Ndinga. Ndinga ke tuba kima mosi; ba ke meka kusala ti organisation kukota kisika mosi kuna. Mpe ba ke kwenda ntama na Ndinga yina, mpe ba ke kotisa yawu mbala mosi na kati ya organisation. Mpe beno me mona kisika ya me kuma? Ya me kuma kaka mutindu mabuundu nionso. Kasi na yina beto ke kina mpe ke boka, mpe beto ke tuba na bandinga ya malu-malu, mpe beto ke lemuka na zulu, nionso yina kele mbote mingi. Organisation ya bawu kele mbote mingi. Mu ke banza ti mu me tuba yawu pwelele. Kasi diambu kele, ti Ndinga yina ya fioti ya Nzambi ke na kutuba. Yawu yina.

¹⁰⁰ Beno ke luta na kumekama. Nzambi ke meka beno mutindu Yandi salaka na Abraham. Yandi ke meka Nkuna ya Abraham na manima, na manima ya yandi. Mpe ntangu yayi, ya kele samu na yina beto ke bakaka ve mwelo ya mbeni, ya kele samu na yina ya kele na bima mingi na kati-kati ya beto, ya kele samu ti beto kele ve na kiyeka ya kukanga ntima samu na kumekama. Mpe beno bika mu tuba na beno kima mosi, kumekama ya Ndinga kele mbote.

¹⁰¹ Ya kele samu na yina beto kele na yawu ve, mpe beto ke vwanda na yawu ata fioti ve. . . na organisation. Mu banza ti Pentecote kele na organisation mosi ya mbote. Mwa bantu ya kulutula mbote mu. . . ke vwandaka. . . ke zingaka na zulu ya ntoto, ba ke vwandaka na organisation yina—yina.

102 Ba-Assemblée de Dieu, mu kele na bankundi kuna. Oh! Mpangi-bakala mosi kuna na Indiana, mu ke kwenda kuna, mu ke vwanda na lukutakanu, mu ke kwikila, kuna, ntama ve. Mpangi Roy Weed, yandi kele muntu ya quartier ya kizunga ya Indiana. Mu ke kwikila ti yandi kele muntu ya busantu. Kasi, yandi kele muntu ya quartier ya ba-Assemblée de Dieu.

103 Quatre carrés, oh, la la, bawu kele mingi! Ralph McPherson mpe mingi ya bampangi yayi ya babakala, yina kele bantu ya busantu, ya kele ve na diambu ya yimbi na baluzingu ya bawu. Bawu kele bantu ya mbote.

104 Kuna na ba-Unitaire, yina ba ke bokilaka bawu mosi, ba-Unitaire. To, ntangu yayi, mu banza ve. . . Ba ke bokilaka yawu dibuundu ya Nkumbu ya Yesu. Jack Moore, mosi yina ba me bokila kuna na. . . Ya kele na bankama na kati ya bawu, babakala ya kitoko, babakala ya mbote, babakala ya busantu.

105 Kasi diambu ya yawu kele, mpangi-bakala, kele yayi, ntangu beno ke kangama na organisation yayi. Beno me mona? Nzambi ke baka ba-organisation yayi, mpe—mpe yawu nionso kele ya kubwa. Beno tala yawu, mambu yinza kuna na kati. Beno tala bakento ya bawu. Beno tala babakala ya bawu. Beno tala mitindu ya bawu. Mu lendaka talisa na beno, bantu ya ba-Assemblée de Dieu yina kele na ba-diacre na conseil ya bawu, yina me kwelaka mbala zole to tatu, milongi ke na kulandila. Bakento na bansuki ya bawu ya kuzenga, ba ke lwata bakupé, ba ke tula maquillage, mpe ba ke tuba kaka ti bawu kele na Mpeve-Santu, samu ba ke talaka na nzikisa ya kutuba bandinga ya malu-malu, to ba ke lemuka na zulu, to ba ke boka.

106 Ba me zimbana Ndinga yina ya fioti ya pima ya Ndinga. Ndinga yina ke keba beno na ndilulu na kulunsi. Ya kele kisika yina ya me vwanda. Yawu yina beto kele ve na baprofete ya kieleka na kati ya dibuundu bubu yayi, mutindu Agabus.

107 Yawu yina, dibuundu bubu yayi, ba—ba ke zitisaka na mpasi kutuba na bandinga ya malu-malu ntangu muntu ke na kutuba, samu ba me kuwa mambu mingi ya yimbi mpe nionso yina, ti ba me zaba ve yina kele mbote mpe yimbi na kati ya yawu.

108 Bantendulu yina kele kaka kele kaka mabanza ya yimbi, muntu mosi ke tuba kaka kima mosi samu yandi me twadisama na kusala yawu. Yina kele ve ntendulu. Ntendulu; kele ve muntu mosi ke telama mpe ke tuba na bandinga ya malu-malu, muntu yankaka ke telama na mwa minuti fioti mpe ke tendula yina yandi me tuba. Ntangu mosi ke na kutuba, yina yankaka ke tendula kaka kuna, na kutubaka mpova na mpova, na nzonzolo mosi, bima nionso mutindu mosi. Muntu *yayi* lendaka vwanda ke pesa profesu, kasi ya kele ve ntendulu. Bayankaka na kati ya bawu, ndinga *yayi* ke pesa kima mosi, *yina* kuna ke pesa kima yankaka. Mpe mosi ke tuba bampova kumi, yina yankaka ke tuba bampova makumi tanu na manima ya yawu, samu na kutendula.

109 *Kutendula* zola kutuba “kutuba, mpova na mpova.” Kana ya kele Ndinga ya Nzambi, ya fwana kwisa, mpova na mpova; nzila na zulu ya nzila, nzila na zulu ya nzila. Ya kele mutindu yina Ndinga fwana kukwisa.

110 Kasi yinki beto me mona? Mambu mingi ya yimbi! Mpe ba me sala yawu, samu, na kisika ya kukangama na Ndinga, ba me tulula yawu kuna. Ntangu muntu mosi ke sala mutindu yina, ba ke bokila yawu Pentecote. Mpe beno me zaba yina ke salama.

111 Ntangu kumekama ke kwisa, ntangu ya kumekama, na yina Nkuna ke banda, ya ke talisa yina Nkuna kele mpe yina ya kele ve. Ntangu yayi, kukondwa kutala yina salamaka, Abraham kangamaka na Ndinga, nsilulu.

112 Kasi bubu yayi organisation lendaka ve kusala yawu. Mpe bayankaka na kati ya beno bampangi-babakala ya ntalu yina ke vwandaka na ba-organisation yayi, beno ke wisana ve na bawu mbala mosi, beno me zaba kisika beno me kwenda. Yikwa na kati ya beno?

113 Mu ke tuba ve, na kati ya kivinga yayi awa, kasi bantu yikwa me vwandaka na malongi ya munu, bantu yikwa me vwandaka na munu, yina ke tubaka, “Mpangi Branham, beto me zaba ti ya kele Kieleka. Kasi kana ba me basisa beto na nganda kuna, yinki beto ke sala?”

114 Mpangi, yinki beto ke sala? Beno kangama na Calvaire, beno kangama na nsilulu, beno kangama na kulunsi, kukondwa kutala konso kima yina.

115 Mpe na kati kuna, bawu kele na bantu ya mbote mingi. Beno me mona? Kasi yina mu ke zola kusala, kele kutuba, yina fwana kubwa. Ya me kubwaka ntangu nionso mpe ya ke kubwa ntangu nionso. Kasi ya kele, kana beno ke kubwa to ve, na Nzambi, beno keba Ndinga ya Nzambi mpe nsilulu ya yandi, ntete. Ba ke meka beno na nzila ya Yawu.

116 Beno ke tula nkumbu ya beno na mikanda, ti beno ke sala yayi to beno ke sala *yina*. Ata ti ya me telemina Ndinga, beno ke ndima yawu kaka. Ya kieleka. Na kati ya ntima ya beno, beno me zaba ti ya kele yimbi. Yawu yina Ndinga yina ya fioti ya pima, Ndinga yina. Kuyituka ve ti beto lendaka ve kukwenda na ntwala, samu ti kima mosi me salama. Beno me kabwana na Ndinga yina ya fioti ya pima. Beno me kima ntama na nswalu nionso. Nzambi ke na kubokila beno, kasi beno me kima ntama na nswalu nionso, samu banzasi me ngana, bansemo me sema, mongo me ningana.

117 Ya ningisaka Elie ata fioti ve, profete yina. Yandi zolaka Ndinga yina, ntete. Yandi tubaka, “Mu ke vwanda kaka awa.”

118 Na yina mingi bubu yayi, me banda kuna, balukutakanu ya kubeluka ya nzutu, bakufwanikisa ya kimuntu, bima nionso ya mutindu na mutindu, mpe ba-sensation yina kele ata fioti ve

na Ndinga ya Nzambi. Ya kieleka. Yinki ya kele? Beto lendaka kuyimba nkunga yayi, “Bayina ke tulaka ntima na Mfumumu. Bika mu kulumusa lulendo ya munu mpe mu bokila Nkumbu ya Nge. Bika mu vingila, Mfumumu, tii mu ke kuwa Ndinga yina ya fioti ya pima.” Mpe Ndinga yina ke vwanda Ndinga ya Masonuku. Ya ke tuba kaka mutindu mosi na Ndinga. Amen. Mbote mingi.

119 Beno tala, Abraham na manima ba tulaka yandi, ba bokilaka yandi kuna, ba kabulaka yandi na bankundi ya yandi ya luzolo, na dibuta ya yandi, na yinzo ya yandi, na bampangi ya yandi, na yinsi ya nzenza. Na lukwikilu yandi salaka yawu. Na yina, samu yandi salaka yawu, Nzambi pesaka yandi nzengolo, samu na kutalisa ti yandi vwandaka mwana ya Nzambi, ti yandi kwikilaka na Yandi samu yandi vwandaka kwikila na nsilulu. Kasi, yandi lendaka ve, yandi monaka yawu ve na kimuntu, kasi yandi tubaka, “Kima nionso yina me telemina Ndinga ya Nzambi kele luvunu.” Kukondwa kutala konso nzikisa yina ke vwanda, ya ke vwanda kaka luvunu.

120 Mu ke zolaka ve kutuba mutindu yayi, kasi mu ke sala yawu. Beno tala. Mpe ntangu beno ke baka bakento, mu ke tuba yawu samu na kima yina kele pwelele, beno lenda mona, yina ke tuba ti ba kele na Mpeve-Santu, mpe yina kele ve na bumuntu mingi samu na ku—kubika bansuki ya bawu kukula, kima mosi ke tambula mbote ve kuna. Kento yina ke lwata lele yina kele samu na bakala, mpe yandi ke lwata yawu, na ntangu Biblia me tuba, “Ya kele busafu samu na—na Nzambi, samu na kento yina ke lwata lele yina kele samu na bakala.” Mpe na yina beno ke tuba ti beno kele na Mpeve-Santu mpe beno ke sala yawu?

121 Mu tubaka samu na yawu kilumu mosi na Oregon. Ya vwandaka na kento mosi yina sonikinaka munu mukanda ya nene mingi. Yandi tubaka, “Mpangi Branham, nge kele na ministere ya kitoko, kasi ya kieleka nge ke na kubebisa yawu.” Yandi tubaka, “Ntangu yayi, yinki nge me tuba samu. . .” Yandi tubaka, “Mu ke lwataka salopette ntangu nionso.” Yandi tubaka, “Yinki ya ke sala kana mu kwenda kuna na disamba samu na kubuka mwa—mwa bambuma na disamba, na robe. Nge ke banza ve ti ya ke vwanda mbote mingi kulwata salopette na kisika ya yawu, to ba-salopette, nionso yina ya kele, kulutila kulwata robe?” Mpe yandi tubaka, “Tala, mu ke mataka na zulu ya bamongo na bana-bakala ntangu ba ke twadisaka bitwisi, mpe,” yandi tubaka, “Mu ke kotaka na bisika yina bambembele ke vwandaka.” Yandi tubaka, “Ntangu yayi, kana mu—mu me lwata robe, ba ke kudia munu. Na salopette ba ke sala mingi kima mosi ve.”

122 Mu tubaka, “Ya kele fioti ti bouillon yina ba me sala na kivudi ya nsusu yina me kufwa na nzala. Mawa! Ya kele ve ata na Ndinga ya Nzambi samu na yawu. yina kele kaka dibanza ya nge.”

¹²³ Nzambi tubaka, “Bika ti ndinga nionso ya munu kuvwanda luvunu, mpe ya Yandi kuvwanda kieleka.” Kento ya munu ke lwataka robe. Yandi ke bukaka mbuma na disamba. Yandi ke vwandaka ve na mpasi samu na yawu. Mpe, na muntu nionso, kento kele ve na kima ya kusala na nkonga ya babakala kuna, samu na kutwadisa bitwisi, na mutindu nionso. Yandi zolaka vwanda na kinkuku kisika ya yandi. Ya kieleka.

¹²⁴ Ba ke meka kaka kuzwa kisika ya kutina, kasi ya kele ve. Ndinga ya Nzambi kele pwelele, mpe kento yina me butuka na Mpeve ya Nzambi ke sala yawu. Mpe bakala yina me butuka na Mpeve ya Nzambi ke bika ve kento ya yandi kusala mutindu yina. Yinki Yandi tubaka? “Yandi yina ke baka, ke zenga basuki ya yandi, ke kondwa luzitu na mfumu ya yandi.” Mpe bakala ya yandi kele mfumu ya yandi. Yandi ke kukondwa luzitu.

¹²⁵ Mu ke sala mbote kuvwanda swi. Mbote mingi. Ntangu yayi, beno me mona, beno me mona, yina me lunga. Beno me zaba yina mu ke tubila.

¹²⁶ Mu ke tuba yawu na mayele ya yimbi. Kana mu ke tuba yawu na mayele ya yimbi, Nzambi kuvwanda na mawa samu na ntima ya munu ya masumu; na yina mu ke fukama awa na autel yayi, kubalula ntima.

¹²⁷ Mu ke tuba yawu samu, bankundi, mu ke zolaka beno. Mpe mu ke meka na kutuba na beno yina kele kieleka, mpe yina kele Ndinga ya Nzambi. Beto fwana kuwa Ndinga ya Nzambi ya fioti, samu na kutesa yawu na Ndinga. Beto ke luta na ntangu ya kumekama. Alleluia!

¹²⁸ Beno me zaba ti na manima ya ntangu yina ya kumekama ke kwisa, malongi yina ya mwana yina me butuka na dibuta ya denomination? Kana yandi me kanga ntima na kumekama mpe yandi me bikala kaka na nsatu ya tata, na yina ba ke basisa mwana-bakala mpe ba ke lwatisa yandi lele mosi, na yina ba ke sala nkinzi. Mpe ba ke tula mwana-bakala yina na kati ya dibuta yina yandi butukaka.

¹²⁹ Yawu yina diambu na ba-Pentecotiste bubu yayi. Ba ke lemuka *awa* mpe *kuna*, mpe ba-organisation ya beto ke benda bawu mutindu *yayi* mpe mutindu *yina*. Ba ke kangama ve na Ndinga.

¹³⁰ Kana ba ke kangama ve na Ndinga, na yina Nzambi, na kumonaka, “Kana beno ke zinga na kati ya Munu, mpe Ndinga ya Munu na kati ya beno,” Yandi, Yandi lendaka ve kumanga Yawu. Ya kele Ndinga ya Yandi. Na yina ya ke vwanda na ntangu mosi, ntangu yina, yina ba ke basisa beno mpe ba ke tula beno na lweka, mpe ba ke pesa beno kima yina kele ya kieleka, alleluia, ngolo ya Nzambi ya Ngolo nionso.

¹³¹ Na yina, Nzambi ke na kuingila bana ya Yandi, kasi bawu ke zola ve kaka kusungama, ntangu ba ke kuma na ntangu yina ya kumekama. Beno ke ndima yawu? “Mbote, dibuundu ke

tula munu na nganda.” Mbote mingi. Yawu yina. Na yina, beno kwenda. Yina kele ve Nkuna ya Abraham. Nkuna ya Abraham ke salaka ve mutindu yina.

¹³² Nkuna ya Abraham! Ntangu yayi, mu ke kipe ve yina vwandaka ya kuswaswana samu na Abraham, yandi kangamaka kaka na Ndinga ya nsilulu, yandi kangamaka kaka na yawu. Ata ti yina Sarah kumaka, bayankaka kumaka, bima ya luswaswanu kumaka, bima nionso, yandi talaka yawu mutindu ya vwandaka ve. Yandi talaka, yandi kwikilaka ti yandi lendaka mona nsilulu, samu Nzambi silaka yawu na yandi, mpe yina vwandaka nionso yina vwandaka samu na yawu. Ya vwandaka Ndinga ya Nzambi, vwandaka kaka na kati ya yandi.

¹³³ Na yina Yandi pesaka yandi kumekama yina ya nsuka. “Mu ke pesa yandi bitini zole, mpe Mu ke meka yandi.” Ntangu yayi, yandi me kuzwa dezia mwana. Yandi me mona ti yandi me kuzwa yawu. “Kasi ntangu yayi Mu ke tuba na Yandi, ‘Nata mwana yina kuna na zulu mpe nge kufwa yandi.’ Mpe bikaka mwana yina, ntangu yandi monaka. . . Yandi ke kufwa mwana yina? Mu ke meka yandi ntangu yayi.”

¹³⁴ Abraham, vwandaka kieleka na Ndinga! Wapi mutindu, ntangu beno me kubaka nsilulu, wapi mutindu beno ke telemisa kima yango? Wapi mutindu, wapi mutindu beno ke sala yawu?

¹³⁵ “Wapi mutindu nge ke vingila kuvwanda tata ya makanda, mpe awa nge kele na bamvula nkama mosi na kumi na tanu? Abra- . . Isaac ya fioti, pene ya bamvula kumi na yiya, bamvula kumi na tanu. Wapi mutindu nge ke vwanda tata ya makanda ntangu nge kele na bamvula nkama mosi na kumi na tanu? Nge kele kaka na mwana mosi, mpe nge ke bebisa nzikisa ya nge mosi kaka nge ke na yawu.” Amen.

¹³⁶ “Wapi mutindu mu ke sala yawu kana mu me basika na organisation ya munu? Wapi mutindu mu ke sala yawu kana mu me sala *yayi*?” Oh, beno kuwa Ndinga yina ya fioti ya pima mpe beno kwisa na Ndinga, Ndinga.

¹³⁷ Beno ke tuba, “Mu kuwaka ndinga mosi ke tuba na munu *yayi*.” Kana ya me swaswana na Ndinga, ya kele ve Ndinga ya Nzambi. Ndinga ya Nzambi ke kwisaka na Ndinga.

¹³⁸ Na yina Abraham kvwendaka kuna na Ndinga, mpe Ndinga ya Nzambi ya pima, ya fioti, na Ndinga ya Nzambi, fwana kubaka luzingu ya mwana ya yandi mosi.

¹³⁹ Yandi tubaka, “Telemisa diboko ya nge, Abraham. Mu me zaba ti nge ke zolaka Munu ntangu yayi. Mpe bayina nionso ke kwisa na manima ya nge, alleluia, bayina nionso ke kwisa na manima ya nge, bayina ke zola kubaka Ndinga ya Munu, ya ke vwanda Nkuna ya nge, mpe na yina yandi ke baka mwelo ya mbeni.”

140 Kana mu vwandaka na ntangu mu zolaka kutuba na beno yina me salama na mwa bilumbu fioti me luta, beno me mona, yina me salama. Oh, la la!

141 “Ba ke baka mwelo ya mbeni; Nkuna ya nge na manima ya nge. Abraham, yina ke sakumuna nge ke kuzwa lusakumunu, mpe yina ke singa nge ke kuzwa nsingulu.” Yesu tubaka, “Ya ke vwanda mbote mingi ba kanga beno ditadi ya nene na nkingu, mpe ba losa beno na kati ya mubu.”

142 Mpe ba-organisation yayi me basisa na nganda bantu yayi ya busantu, samu ba me kangama na Kieleka, Ndinga, mpe Mpeve mpe ngolo ya Nzambi, mpe ba me kangama na Ndinga, beno me mona yina me salama? Ba me losa bawu na kati ya mubu ya kuzimbana.

143 “Ya ke vwanda mbote mingi ba kanga ditadi ya nene na nkingu ya beno, mpe ba losa beno na kati ya mubu, kana beno me niongisa Bantu yayi ba me pakula.” Nani bawu kele? Nkuna ya Abraham yina me kangama na Ndinga ya nsilulu.

144 Mabuundu ya beto yankaka me kuma na kisika yina ba ke manga. Ba ke manga kubeluka ya Kinzambi. Ba ke zola yawu diaka ve na mabuundu ya bawu. Ya kieleka. Ba-organisation ya beto ya ba-Pentecotiste ke zola diaka ve kubeluka ya Kinzambi. Yinki ya kele? Beno me mona ve mutindu diabulu me sala? Yandi ke baluka kuna mpe yandi ke tuba bima ya yimbi mutindu yayi. Mpe bantu ya kulonguka ke banza ti bawu kele ya kimpeve, mpe ba ke tala na yawu, mpe ba ke tuba, “Beni tala muntu *yina*. Beni tala muntu *yina*.” Mu ke tala ve na yawu.

145 Kana beno kele Nkuna ya Abraham, beno ke tala nsilulu ya Nzambi, yina Nzambi me tuba na kusala samu na yawu. Yawu yina. Nkuna ya Abraham, beto ke tala na nsilulu. Mu ke kipe ve bantu yikwa ke kubwa mutindu *yayi* mpe bantu yikwa ke kubwa mutindu *yina*. Nsilulu kele kaka kieleka.

146 Beni fwana kuluta na bakumekama. Beni me mona? Yinga. Abraham, ba mekaka yandi ntete, mpe na manima ba tulaka yandi kidimbu, na yina ba pesaka yandi nsilulu ti “Nkuna ya yandi ke baka mwelo ya mbeni.” Mu ke zolaka yawu. Na yina, ba bakaka mielo ya mbeni ya bawu na manima ba mekaka bawu.

147 Diambu ya yawu kele, beto kangaka ve ntima na kumekama. Yawu yina ba-organisation ya beto lendaka ve kukanga ntima na kumekama. Ya kele ve luzolo ya Nzambi. Ya kele, Nzambi me sakumuna yawu, kasi ya kele ve luzolo ya Nzambi. Samu, beno me mona, beno kele na kompani ya muvimba ya bantu awa na bakompani ya muvimba ya mabanza, mpe ba ke vukisa bawu kintwadi mpe kubasisa ya kulutila mbote yina ba lendaka. Bayankaka kati ya bawu ke tuba, “*Yayi* kele muntu ya nene. Beni lendaka ve kumanga ndinga ya yandi.” Mbote, ya kele mutindu yina kele organisation ya dibuundu ya Catholique, kima mosi, na zulu ya nkonga ya bakwikidi ya kulonguka. Bantu

ya kulonguka, ba ke talaka na yawu, ke landa yawu na bantangu. Beno lendaka ve kusala yawu. Bima nionso yankaka kele luvunu kasi kaka Ndinga ya Nzambi.

148 Abraham talaka ata fioti ve kima yankaka kasi nsilulu ya Nzambi. Kukondwa kutala yina vwandaka, yandi kangamaka na nsilulu ya Nzambi.

149 Na yina yawu yina beto ke mona mingi ve. Organisation lenda ve kubaka mwelo ya mbeni. Yawu yina ya ke na mabanza mingi ya malu-malu kuna na kati.

150 Mu fwana baka muntu mosi, yina ke baka mwelo ya mbeni. Beno lenda kusala yawu kana beno me zola. Yinga, tata.

151 Beto meka kutala fioti, na mwa ntangu fioti, kana ba ke bikala na kati ya Masonuku.

152 Ntangu yayi, ya vwandaka na ntangu mosi kuna na Babybone ntangu ba salaka kiteki mosi ya kitoko, ya dibuundu ya Catholique, mpe bayina nionso vwandaka fukama ve na ntwala ya kiteki yina ke kuzika na dibulu ya tiya. Ntangu yayi, ya kumaka na ntangu ya kumeka ngolo, kana ba ke bikala, ntangu Nzambi tubaka, “Beno ke vwanda na banzambi yankaka ve na ntwala ya Munu, to beno ke sala ve kiteki mosi ya konso mutindu yina.” Yawu yina Nzambi tubaka. Ntangu ya kumeka ngolo kwisaka.

153 Bayankaka nionso ya Israel kubwaka kaka kuna. Mpe ntangu mpungi bulaka, mpe harpe bulaka, mpe—mpe fluite bulaka, na yina, bawu nionso fukamaka na ntwala ya kiteki yayi.

154 Kasi ya vwandaka na tatu na kati ya bawu yina tubaka, “kima ya kusala kele ve.” Bawu kuwaka Ndinga yina ya fioti ya pima, mpe bawu bikalaka na ndonga na Ndinga. Yinki bawu salaka? Bawu kangamaka na Ndinga.

155 Mpe na manima, bawu—bawu—bawu tubaka, “Kana beno ke sala yawu ve. . . Beto ke pesa beno siansi yankaka, to beto ke losa beno na dibulu ya tiya.”

156 Bawu tubaka, “Nzambi ya beto kele na kiyeka ya kuvulusa beto na dibulu ya tiya.” [Kisika ya mpamba na bande—Mu.] “Kasi, ata mutindu ve, beto ke kangama na Ndinga.”

157 Ntangu yayi, mpangi, yinki samu na nge? “Yinki mu ke sala, Mpangi Branham?” Beno kangama na Ndinga. Beno kangama na nsilulu. “Dibuundu ya munu ke kwenda ntama na munu.” Beno kangama na nsilulu. Ya ke bebisa kitoko ya yawu, beno kwenda kaka kilumbu mosi, na mutindu nionso. Kasi, Nzambi lendaka ve. Beno kangama na nsilulu. “Mbote, mu ke tuba na beno, ba ke basisa munu na nganda.” Beno kangama na nsilulu, kaka mutindu mosi. Beno kangama kaka na nsilulu. Ntangu yayi, kana beno lendaka kangama na nsilulu mpe kuvwanda kuna, beno vwanda kaka kuna na bawu na ntangu yina.

¹⁵⁸ Kimpangi na muntu nionso. Kasi ntangu yayi awa, na yina, beno ke nunga ata fioti ve mutindu yankaka kasi na kuvukanaka na bantu nionso. Beno ke sala yawu. Ntangu yayi, ntangu ba me kuma yimbi mingi, ba me kuma na mambu ya mansoni, na yina beno kwenda ntama na yawu. Ya kieleka. Beno kwenda ve na kizunga ya mbeni. Kasi kana beno ke meka na kununga mpangi ya beno, yina me swaswana. Beno me mona?

¹⁵⁹ Ntangu yayi beno tala. Kasi ke nunga ata fioti ve dibanza ya organisation, muntu mosi. Ve, tata. Na yina, bawu kele na nsiku ya bawu, “Beto ke kwikilaka *yayi*, point!” Kana beno zolaka sonika malongi ya beno, “Beto ke kwikilaka *yayi*,” virgule, ya zolaka vwanda ya kuswaswana. Virgule ke zola kutuba, “Beto ke kwikilaka *yayi*, mpe beno fwana kota na *yayi* mpe kutula nkumbu ya beno na mukanda, to yawu yina kaka.”

¹⁶⁰ Kasi kana beno me tuba, “Beto ke kwikilaka yayi,” virgule, “kuyika na mutindu nionso beto lendaka kulonguka na Nzambi. Beto kele ya kuzibula samu na Mpeve-Santu,” na yina beno ke kwenda na ntwala, mpangi-bakala. Yinga. Yina ke vwanda ya kuswaswana ntangu yayi.

¹⁶¹ Kasi, beno me mona, kana beno me sonika yawu na virgule, mpe Nzambi me pesa kima yankaka kuna, ya me talisama ti ya kele Ndinga ya Yandi, Kieleka, beno lendaka ve kuningana, samu ya kele “point.” Yina kele nsuka ya yawu. Ya kele kisika yina ba-Luthérien me kufwa. Ya kele kisika yina ba-Methodiste me kufwa. Ya kele kisika yina ba-Baptiste me kufwa. Ya kele kisika yina ba-Presbytérien me kufwa. Mpe ya kele kisika yina ba-Pentecotiste me kufwa. Ya kieleka. Ya kieleka. Bawu me kufwa kaka kuna, beno tala kaka, samu ya me—ya me sonamaka ntete kuna. Ya kele ve na kima yina beno—beno lendaka yika na yawu to kukatula na yawu. Ya kele—ya kele kuna. Ya kele malongi ya beno.

¹⁶² Ba-Luthérien lendaka ve kundima kusantisama. Ve, tata. Ya me tuba, “Muntu ya kieleka ke zinga na lukwikilu.” Martin Luther ve; kasi kimvuka yina landaka yandi. Ya kieleka.

¹⁶³ John Wesley ve; kasi kimvuka yina landaka yandi. Ya kieleka.

Calvin ve; kasi kimvuka yina landaka yandi.

¹⁶⁴ Ya kele ve dibuundu ya ba-Baptiste ya John Smith, yina sambilaka mingi, na kati-kati ya mpimpa, tii meso ya yandi kangamaka, samu na dibuundu ya yandi; mpe kento ya yandi twadisaka yandi kuna na mesa, mpe pesaka yandi madia kuna, na lutu. Yandi ve; kasi nkonga ya ba-Baptiste yina vwandaka landa yandi, organisation yina kwisaka na manima ya yandi.

Alexander Campbell ve; kasi yina landaka yandi.

¹⁶⁵ Ya kele ve mouvement ya pentecote na mbandukulu, yina vwandaka na bima nionso na kimvuka, mpe vwandaka na

kimpangi na muntu nionso; kasi bimbuka yina kwisaka mpe tubaka, “Ve. Beto kele *yayi*, mpe beto kele *yayi*. Mpe *yayi* kele bantumunu, mpe yawu yina kaka!” (“Ba ke kabwana bawu mosi, ya ke monana ti ba kele ve na Lukwikilu.”) Ya kieleka. Yawu yina ya salaka. Yina kele kima ya yimbi. Amen. Mu kele na nsatu ya musambidi, na suka *yayi*.

¹⁶⁶ Bana ya ba-Hebreux, na manima bawu kangama ntima na kumekama, kana ba ke kangama na Ndinga ya nsilulu, to ve, ba tulaka na kumekama. Mpe yinki ba salaka? Bawu bakaka mwelo ya mbeni. Amen. Samu na yinki? Bawu kangamaka na Ndinga.

Beno kangama na Ndinga, Ndinga ya Nzambi yina ke na kutuba na beno.

¹⁶⁷ Ntangu *yayi*, bawu nionso tubaka, “Ntangu *yayi*, beno tala. Babylone, ya ke sala luswaswanu mosi ve. Samu, beto, ntangu beto ke fukama na ntwala ya kiteki *yayi*, beto ke sambila Nzambi, na mutindu nionso. Mbote, kana beto sala yawu mutindu *yayi*, beto ke tuba yawu mutindu *yayi*.”

Beno sala yawu mutindu Nzambi me tuba.

¹⁶⁸ Yinki kana Nzambi tubaka, “Moise, katula basapatu ya nge, Moise. Nge kele na kisika ya santu.”

¹⁶⁹ Yandi tuba, “Matondo na Nge, Mfumu. Ya kieleka mu ke kwikila na Nge. Mu ke katula kaka yimpu ya munu, na kisika ya basapatu. Ya kele mpasi mingi na kuzibula bansinga ya sapatu ya munu.” Uh-huh. Huh! Ya lendaka sala ata fioti ve.

Yandi tubaka, “Sapatu.” Yandi tubaka ve “yimpu.” Ya kieleka.

¹⁷⁰ Beno fwana kukuma kuna, nzila na nzila, yina Nzambi me tuba, mpe kulanda yawu na Ndinga ya Yandi.

¹⁷¹ Ntangu *yayi*, na manima ba lutaka na kumekama, ba bakaka mwelo ya mbeni ya tiya. Ba monaka ti, ntangu ba kumaka kuna na nsuka, ya kukangama na Ndinga ya Nzambi, ba bakaka mwelo. Ya kieleka. Na manima . . .

¹⁷² Daniel. Ba salaka nsamunu mosi, mpe ba sonikaka yawu na ba-Medo-Perses, yina ba lendaka ve kusoba, ti, “kana muntu mosi me sambila nzambi yankaka, ba ke losa yandi na dibulu ya bankosi.” Mpe Daniel zabaka ti Ndinga ya Nzambi vwandaka, samu na kusambila Yandi kaka, na yina yandi zibulaka kaka banela mpe yandi sambilaka kaka. Ntangu *yayi*, yandi vutukaka ata fioti ve kuna na nsongi. Yandi zibulaka banela na ntwala ya tempelo. Yandi vwandaka ve na nsoni ya yawu.

¹⁷³ Mpe beto zola ve kusadila nsambulu ya beto na Lumingu, Mpe na Kilumbu ya Ntete beto ke sala kima yankaka. Kasi, beto ke kwikila kima mosi na kati ya ntima ya beto, beto ke kwisa na ntwala ya muntu yankaka mpe beto ke tuba, “Mbote, mu me zaba ve. Yinga, mu banza nge kele ya kusungama.” Beno vwanda yina beno kele. Kana beno kele ve, beno basika na chaire, beno basika

na dibuundu. Ya kieleka. Samu, beno kele na mfuka na nionso zole. Beno bikala kaka yina beno kele. Beno tuba yina beno ke kwikilaka, na yina beno kele ve na kima ya kubumba. Beno ke telama kaka samu na yina kele kieleka. Muntu nionso me zaba batinta ya beno. Bantu ke sepela na beno, muntu nionso.

¹⁷⁴ Kento lendaka vwanda kaka ya kukondwa kitoko mutindu bantu nionso ke basikaka. Yandi lendaka vwanda nene, mbinga, fioti, mpembe, na bansuki ya ndombe, na meso ya mbwaki, na meso ya bleu, na meso ya mpembe; mosi, mutindu yayi, mpe mosi mutindu yina. Kasi kana kento yina kele mama, ya busantu, ya kele ve na bakala mosi na kati ya yinsi kasi yina ke katula yimpu ya yandi samu na bawu, kana yandi kele na ndambu ya bubakala na kati ya yandi. Ya kieleka. Samu, yandi—yandi ke talisa yina yandi kele, mpe babakala ke sepela na yawu.

¹⁷⁵ Na yina Nzambi ke sepela na bakala yina ke vwanda yina yandi kele, to bakala yina ke tuba Buklisto. Beto vwanda Baklisto, ya kifuluka na Mpeve-Santu, na Ndinga ya Nzambi, to beno zimbana yawu. Ya kieleka. Samu, na mutindu yankaka, beno me kuma muntu ya luvunu, mpe beno ke zinga luzingu ya kuswaswana. Mpe bantu yina ke mona beno ke basika awa ke kina, mpe kunwa makaya, mpe bima ya mutindu yina, mpe beno ke tuba ti beno kele Muklisto, na yina, beno me mona, beno ke tula disakuba na nzila ya bantu yankaka.

¹⁷⁶ Beno tala beno bakento, mbala mingi, wapi mutindu ba ke zenga bansuki ya bawu mpe ba ke lwata mpe ke zinga na mwa ba-robe yayi ya ntama ba me lwata, ba ke monana mutindu bantu ya kukondwa ngolo yina ba me katula mpusu to kima mosi, mpe ba ke basika kuna na bala-bala, ba ke tambula kuna, na talon ya yinda mutindu *yayi*, ba ke denda kuna na bala-bala. Yina kele Pentecotiste? Na yina mabuundu yankaka ke tuba, “Ba ke tuba ti bawu kele na kima yina ba kele na yawu ve.”

¹⁷⁷ Ba me tula beno kidimbu mpe beno me baka kidimbu na Mpeve-Santu. Beno kele ve na kivinga ya makinu na nkokila yayi mpe kusimbama na maboko ya bakala mosi, yina kele ve bakala ya beno; na nkokila ke kwisa, mpe beno ke vutuka na yinzo-Nzambi mpe beno ke kina bisika nionso. Yina kele ve pentecotiste. Yina kele luvunu. Yina kele mvindu.

¹⁷⁸ Mu ke tuba mingi ve na beno. Kasi, beno zaba, ba-bande yayi ba ke salaka awa ke kwenda kuna na yinza ya muvimba, na yina mu ke longa kaka mutindu ya kele samu na yinza ya muvimba. Ntangu mu ke kuwa Nzambi ke tuba, “Tuba kima yayi,” mu ke tuba yawu kaka, samu mu zaba ve kisika ya ke kwenda. Ya me tala Yandi na kukeba yawu. Beno kangama kaka na Ndinga. Ya kieleka. Mbote mingi.

¹⁷⁹ Ve, Daniel lendaka ve kufukama na nsamunu ya bawu, ata ti ba ke basisa yandi na organisation to ve. Yandi vwandaka kaka

na nela, mpe kangamaka na Ndinga ya Nzambi. Yandi vwandaka ve na nsoni ya Yawu.

¹⁸⁰ Yinki salamaka? Ba losaka yandi na dibulu ya bankosi, kasi yandi bakaka mielo ya dibulu ya bankosi. Samu na yinki? Nkembo! Samu Nzambi tubaka ti yandi. . . “Nkuna ya nge ke baka mwelo ya mbeni.” Ata nionso yina mbeni kele, beno fwana baka mwelo. Oh, bambala yikwa beto lendaka. . . ?

¹⁸¹ Beno tala Moise, na kulandaka nzila ya misiku ya Nzambi, yandi kwendaka kuna na Egypte, ya monanaka ti bima nionso vwandaka ya kuswaswana. Yandi vwandaka na mwa bamekudi yina kwendaka na yandi. Yandi kwendaka kuna na—na mwa bidimbu, samu na kutalisa ti ba me fidisa yandi. Yandi losaka nioka kuna, mpe nionso yina mutindu yayi.

¹⁸² Mpe bamekudi kwisaka kuna, ba losaka ya bawu kuna. Yinki yandi lendaka sala? Kima mosi ve. Nzambi tubaka na yandi ata fioti ve ti ba ke sala mutindu yina. Yandi zolaka kumeka Moise. Yandi vwandaka Mosi Yina pesaka muswa ti Jannès mpe Jambres kulosa banioka ya bawu, to bankawa ya bawu.

¹⁸³ Na yina Moise telemaka kuna na ndonga ya kisalu. Yandi losaka nkawa ya yandi. Yawu kumaka nioka. Yandi tubaka, “Tala yayi, Pharaon. Yawu yina Mfumu ya munu na kukwisa, kusala na ntwala na nge.”

¹⁸⁴ Pharaon tubaka, “Beno kwisa awa, Jambres na Jannès.” Bawu losaka bankawa ya bawu kuna. Ya kitukaka banioka, yina Moise salaka.

¹⁸⁵ Kizizi ya yandi kumaka mbwaki? Ve, tata. Yandi kwikilaka kaka ti Nzambi fidisaka yandi. Yandi kangamaka na nsilulu yina. Mpe yinki salamaka?

¹⁸⁶ Ya kele ntangu beno kele na ntwala ya mwa balukutakanu ya beno. Kizizi ya beno lendaka kukuma mbwaki, fioti. Beno kangama na Ndinga.

¹⁸⁷ Yinki salamaka? Nionso na mbala mosi, cobra yayi ya nene ya Moise kwisaka kuna mpe minaka bawu. Nzambi siamisaka. Na manima ya kumekama ya yandi, yandi tubaka, “Mu ke lomba nge, na nzila ya kidimbu yayi, nge bika bana yayi kukwenda kuna. Mu ke lomba na nge na kuvutula bawu na yinsi ya bawu, kisika ba ke vwandaka. Nzambi me kulumuka kuna samu na kutuba, ti Yandi me fidisa munu awa samu na kuvulusa bawu. Mu ke zola ti bawu vutuka.” Yandi losaka yawu kuna.

¹⁸⁸ Oh, kumekama kwisaka. Moise, yinki nge ke sala, baluka, kwenda kuna, tuba, “Mbote, mu lendaka vwanda na kifu”? Ve, tata.

Moise telemaka kaka kuna, “Nzambi me tuma yawu.” Nkembo!

¹⁸⁹ Ntangu Nzambi me tuba kima mosi, beno kangama na Yawu. Ata ti nionso yina ke salama, beno kangama na Yawu. Kana ba

ke basisa beno na nganda mpe ke tuba, “Beto ke wisana diaka ve, beto sala ve *yayi*,” beno kangama na Yawu.

¹⁹⁰ Moise kangamaka kaka na yawu. Yinki salamaka? Yandi bakaka mwelo ya mbeni ya yandi. Alleluia. Diabulu tubaka, “Mu ke vimbisa Nzadi Mungwa na ntwala ya beno,” kasi yawu zibukaka. Ba lendaka diaka ve kukanga bawu na Egypte. Yandi bakaka mwelo ya mbeni. Samu na yinki? Samu yandi kangamaka na lutumu yina Nzambi pesaka yandi. Misiku ya Nzambi, yandi kangamaka na Ndinga ya Nzambi mpe yandi bakaka mielo ya mbeni.

¹⁹¹ Josué, na manima yandi lutaka na kumekama. Yandi vwandaka kuna, mu banza, mpe yandi zabukaka Jourdain, yandi na Caleb, na balangididi. Ntangu yandi katukaka kuna na Jourdain, bawu kumaka kuna na Kadès-Barnéa. Mpe bawu nionso tubaka, “Oh, kana beto banda, ya ke buka ba-organisation ya beto na bitini. Beto lendaka ve kukota kuna.”

¹⁹² Mpeve yina me kufwaka. “Oh, beto lendaka ve kuzwa Yawu. Kana beto longa Yawu na bantu ya beto, yinki beto ke sala? Beto ke baka kaka kati-kati ya ba-diacre, na kati ya dibuundu, kuna. Ba me kwelanaka mbala zole, mbala tatu. Yinki beto ke sala? Beto, na yina, kana beto me tuba na bakento ya beto ti ba lendaka vwanda na bansuki ya yinda, beno zaba yina ba ke sala? Ba ke katuka na dibuundu. Mpe yinki beto ke sala? Na yina, beto ke monana kaka mutindu bantu ya ntama.” Yesu vwandaka muntu ya mambu ya ntama, mpe. “Beto lendaka ve kusala yawu. Beto lendaka ve kusala yawu. Ya kele mpasi mingi samu na beto.”

¹⁹³ Beno zaba yina mukwikidi ya ndilulu ke kuzwa. Hebreux, kapu 6, ke tendula yawu. “Yandi yina vwandaka me kuzwa nsemo, makabu ya mazulu ya Mpeve-Santu, yina me vutukila luzingu ya yandi ya ntama, yandi ke kusoba diaka ve luzingu ya yandi mbala ya zole.” Yandi me kuma na ndilulu yina mpe yandi me manga na kukwenda kuna, na yina, yandi me manga ya muvimba na kukwikila.

¹⁹⁴ Samu, yinki Caleb salaka? Yinki Josué salaka? Yandi tubaka, “Beto kele na kiyeka kulutila na kubaka yawu.” Samu na yinki? Bawu kangamaka na yina Nzambi silaka.

¹⁹⁵ Na yina, bawu tubaka, bayankaka tubaka, “Mbote, bawu kele bilombe. Bawu nionso kele na kati ya bibaka. Bawu kele mutindu *yayi*. Na yina, beto lendaka ve kusimba bawu, ata fioti ve kuna na kati.”

¹⁹⁶ Josué tubaka, “Beto kele na kiyeka mingi ya kusala yawu. Beno vwanda swi, beno bantu! Beno kanga bayinwa ya beno! Beno vwanda!” Amen.

¹⁹⁷ Mu ke tuba na beno, lukwikilu kele na kima ya nene, ntangu ya me kwisa na Ndinga ya Nzambi. Ya ke vwandaka ve na boma na ntangu yina. Lukwikilu ke vwandaka na mika na ntulu. Ya ke tuba, “Beno kanga yinwa!” Bima nionso yankaka ke bumbama

kuna na nsongi, ya kieleka, ntangu Nzambi ke tuba. “Kana beno ke zinga na kati ya Munu, mpe Bandinga ya Munu ke zinga na kati ya beno, beno tuba yina beno me zola.” Yawu yina. Oh, mu ke zolaka yawu. Hum!

Bampeve ya yimbi ke tekita, mpe bansumuki
ke vumbuka;
Lukwikilu na Yehowa ke ningisa bima nionso.

¹⁹⁸ Wapi mutindu beno lendaka vwanda na lukwikilu ntangu beno me zaba ti beno ke sala ve, beno ke tambula ve na Ndinga ya Yandi, ntangu beno me zaba ti ya kele na bima yina kuna beno lendaka kutuba mpe beno lendaka ve kutuba? Ya kele na bima yina beno lendaka longa mpe beno lendaka ve kulonga. Ya kele na bima yina beno lendaka ve kutuba, mpe wapi mutindu beno lendaka vwanda na lukwikilu ntangu beno me zaba ti beno me sala yimbi?

¹⁹⁹ “Kana ntima ya beto ke na kufunda beto ve.” Yawu yina. Yawu yina. Kasi beno kangama na Ndinga yayi, kana kima mosi ve na kufunda beno. “Ya kele ve na lufundusu samu na bayina kele kati na Klisto Yesu, yina ke tambula ve landila nzutu kasi landila Mpeve.” Mpeve ke tadisaka na Ndinga, samu Mpeve lendaka kaka kukwisa na Ndinga, samu Ndinga ya Yandi kele Mpeve. Mpe Yawu lendaka kaka. . . Mpeve ya Nzambi ya kieleka lendaka kaka kutuba Ndinga ya Nzambi. Oh, la la! Oh, oh!

Kwenda ntama, yinza. Satan, bika beto.

²⁰⁰ Beno vwanda na boma ve na kutuba na mongo yayi, “Katuka awa.” Beno tuba yawu. Beno vwanda kuna, beno tala kubwa ya yawu. Ya kieleka.

²⁰¹ Kasi kana beno kele na lufundusu kuna, kulutila mbote—kulutila mbote beno vwanda swi. Beno ke na kukuma na ntangu. Beno ke na kutuba ve kieleka. Beno ke na kutuba ve mambu yina beno lendaka tuba. Mbote mingi.

²⁰² Beto ke mona na yina ti Josué, na manima yandi lutaka na kumekama yina, yandi monaka nzikisa ya yinsi ya mbote, mpe yandi telemaka kuna na Kadès-Barnéa mpe bokutaka samu na bawu nionso, mpe yandi tubaka, “beto kele na kiyeka ya kulutila na kubaka yawu. Beto lendaka baka yawu.” Yinki vwandaka dibanza? Kuzabuka.

²⁰³ Yinki vwandaka dibanza ya Moise? “Talisa kidimbu yayi mpe basisa bana kuna.” Mpe ya monanaka ti yawu kubwaka. Kasi yandi kangamaka na Ndinga, mpe mwelo ya Nzadi Mbwaki lendaka ve kusimba yandi. Yandi zabukaka yawu kaka. Yandi bakaka mwelo ya mbeni.

²⁰⁴ Josué, talaka na nsilulu ya Nzambi, yandi tubaka, “Beto kele na kiyeka ya kulutila na kubaka yawu.” Ya kieleka. Mpe ntangu yandi kumaka kuna na Jourdain, yinki ya salaka? Ya pesaka nzila. Amen. Yawu yina. Yandi bakaka mwelo ya mbeni.

Jourdain yina vwandaka pekisa yandi na kukwenda kuna mpe kubaka nsilulu yina. Kasi ntangu yandi kumaka kuna, yandi vwandaka Nkuna ya Abraham. Samu na yinki? Yandi kwikilaka Ndinga ya Nzambi. Ya kele na mutindu mosi kaka beno lendaka vwanaka Nkuna ya Abraham, ya kele kukwikila Ndinga ya Nzambi. Mpe na yina yinki yandi salaka ntangu yandi kumaka kuna na kisika yina yandi vwandaka ya kukubama samu na kubaka mbeni? Nzambi zibulaka mwelo, mpe yandi bakaka yawu, bakaka yawu, yandi zabukaka.

²⁰⁵ Ntangu bitumba ya ntete, mvita ya ntete yandi kuzwaka na bawu, bibaka vwandaka nene mingi ti ba lendaka nata chariot mosi na zulu ya yawu. Wapi mutindu yandi ke kotisa bawu kuna na kati? Ba tinaka yandi, ba vutukaka kuna na kati. Mbeni mpe, ke vutuka. “Kasi beno ke baka mwelo ya mbeni.”

²⁰⁶ Yandi tubaka, “Mfumu, yinki mu fwana sala?” Yandi balukaka kuna, na manima ya midi mosi, yandi vwandaka banza. Yandi monaka Muntu mosi me basisa mbele ya Yandi kuna. Josué bendaka mbele ya yandi, yandi tubaka, “Nge kele samu na beto? To Nge kele samu na mbeni ya beto?”

Yandi tubaka, “Mu kele Kapitene ya muzabisi yayi.”

“Yinki mu fwana sala?”

²⁰⁷ “Beno tambula pene-pene ya yawu, bambala kumi na tatu. Beno bula mpungi. Beno ke baka mwelo ya mbeni.”

²⁰⁸ Yawu kubwaka. Yinga, tata. Samu na yinki? Yandi vwandaka Nkuna ya Abraham, yina kebaka Ndinga ya Nzambi. Yandi bakaka mwelo nionso yina kwisaka na yandi. Ya kieleka.

Ntangu me luta. Mu fwana kusala nswalu.

²⁰⁹ Beno tala, ba-hero yayi nionso ya ntalu, kele na ba-page ya kufuluka na bisono ya bawu kuna. Kasi ba-hero yayi nionso ya ntalu, bima yina bawu salaka, na nsuka bawu kufwaka.

²¹⁰ Kasi na manima ke kwisa Nkuna ya lukwikilu ya kieleka, Nkuna ya Abraham ya Kimfumu, Yesu, nsilulu. Abraham vwandaka na Isaac, kieleka, landila nzutu, kasi Nkuna ya kieleka vwandaka ve na systeme yina ya organisation. Ya vwandaka ve na nsilulu yina ya Ndinga ya Nzambi, ti Yandi ke sala yandi tata ya makanda, na nzila ya Isaac, kasi na nzila ya Nkuna ya Kimfumu, Yesu. Yina vwandaka Nkuna ya Kimfumu, na yina, bubu yayi, Nkuna ya Abraham, Yesu, vwandaka ve Juif, to Yandi vwandaka ve Muntu ya makanda. Yandi vwandaka Nzambi. Beno me mona?

²¹¹ Beno ba-Catholique yina kele awa, Nzambi sakumuna ntima ya beno. Kasi ntangu beno ke sambilaka Marie mutindu nzambi ya kento, yinki ke tambula mbote ve na beno, na mutindu nionso? Marie vwandaka kima mosi ve kasi kento. Nzambi soolaka yandi. Yandi vwandaka kibumbulu. Yawu yina. Kibumbulu, yawu yina kento kele, kasi yandi me vukana na nkuna ya bakala.

212 Kasi, ya kele kivinga ya bakento na babakala, kasi mu fwana tuba yayi samu beno bakula yina mu ke na kutuba. Ntangu yayi, beno kuwa dokotolo ya beno—ya beno, mpe mu kele mpangi ya beno ya bakala. Ya kieleka, beno lendaka kusala yawu.

213 Marie vwandaka ve na pollen na Klisto. Ya vwandaka ve na mpusa ya nzutu ntangu Mpeve-Santu fikaka yandi na kivudi, ata fioti ve. Kasi Nzambi ya Ngolo nionso, Mvangi, vangaka cellule ya Menga mpe pollen. Hum! Kana ya vwandaka pollen ya Marie, na yina bantu ya kufwa ke vumbuka ve.

Nkembo! Ya me kwisa kaka na malu-malu. Mu me kanga yawu.

214 Na yina kana beno ke tuba ti luswaswanu kele ve, yinki beto ke sala, na yina samu na yinki Nzambi me tuba na beto na kutina bima ya yimbi? Samu na yinki Nzambi vumbulaka na lufwa nzutu ya Yesu, kana ya kele ve mutindu yina? na yina, beno me mona, ya zolaka vwanda ve na kento mosi kintwadi na yawu. Kana ya vwandaka mutindu yina, na yina nzutu ya Yandi vwandaka landila mama ya Yandi, Marie, samu yandi vwandaka na diambu ya mpusa ya nzutu na kivudi ya mpeve yina salaka ti yandi kupesa nkuna ya bakala, mpe ya kele luvunu. Mpeve-Santu, na nzila ya kivumu ya bumwense, alleluia, Yandi vangaka kuna nkuna ya bakala mpe ya kento.

215 Yesu bokilaka yandi “mama” ya yandi? Beno tala yawu na kati ya Masonuku. Yandi bokilaka yandi “kento.” Alleluia! Kento! (Ya kele nzutu. Yawu yina ya ke sala yawu mutindu ya ke na kusala.) “Kento, tala mwana ya nge.” Ba-million ya ba-kilomètre na yandi ti Yandi vwandaka.

216 Yandi vwandaka Nzambi. Yandi vwandaka Juif ve to Muntu ya makanda. Yandi vwandaka Nzambi, nsuni mpe nzutu, Nzambi vwandaka na kati ya Yandi. Nzambi vwandaka na kati ya nkuna ya kento? Ya lendaka ve kusala yawu. Nkuna yina ya kento vwandaka na kima ya kusala na nzutu ya beto. Kasi ya vwandaka Menga na nkuna, yina Nzambi fikaka na kivudi.

217 Yandi lendaka tula yawu na kisina kana Yandi zolaka sala yawu. Yinga, tata. Yandi lendaka tula yawu konso kisika yina Yandi me zola.

218 Kasi Yandi nataka yawu samu kento vwandaka ya kubwa. Kuna butukaka Mwana ya bumwense ya Nzambi ya moyo, yina ba me vanga, yina me butuka na bumwense, nionso zole nzutu mpe moyo.

219 Samu na yinki David tubaka, “Mu ke mona ve Santu ya Munu...kubika Muntu ya Munu ya Santu kumona kupola, Muntu ya Munu ya Santu kumona kupola. Mu ke bika ve moyo ya Yandi na difelo”? David tubaka mutindu yina. Beno me mona? Nionso zole moyo, nzutu, mpe mpeve, ba vangaka na Nzambi, na nzila ya Yandi.

220 Kento vwandaka ve mama. Yandi vwandaka kento. Mu ke kwikila ti yandi vwandaka kento ya mbote, ya santu. Ya kieleka. Yandi zolaka vwanda ata fioti ve kibumbulu. Nzambi zolaka soola ata fioti ve kibumbulu ya mvindu. Kana Mfumu kuzola, mu ke longa na nkokila yayi, kasi, “Yinki kele kibumbulu ya ntama ya mvindu?” Samu na kunata Yandi, samu na kunata Mwana ya Yandi na ntoto, Yandi soolaka “mwense yina me zaba bakala mosi ve.” Yandi pesaka ve nkuna mosi to kima yankaka ntangu Mpeve-Santu fikaka yandi na kivudi. Samu, Nzambi, na bumwense ya Yandi, na mutindu ya seko, vangaka na kati ya yandi: moyo, nzutu, mpe mpeve, ya Yesu Klisto. Ya kieleka. Yandi vwandaka Mwana ya Nzambi yina butukaka na mwense.

221 Yinki yayi salaka? Ya bukaka mwelo ya mbeni. Alleluia! Fiou! Yayi ke sala mbote, na munu. Beno tala. Samu na yinki? Yandi bukaka mwelo ya mbeni kuna, ti muntu nionso yina me butuka na yinza yayi na nzila ya mpusa ya nzutu, yina lendaka ve kukwenda na Zulu samu ti sexe kele yina bandaka yawu na mbandukulu, na disamba ya Eden, na yina bawu kukifikaka bawu mosi. Ntangu Yandi salaka yawu, Yandi bukaka kima yina na bitini zole kuna, mpe bakaka mwelo ya mbeni. Na nzila ya yinki? Kubaka Nkuna ya Abraham, na ntangu ya ntete, mpe yandi bukaka yawu na nsi. Nkuna ya Kimfumu ya lukwikilu mpe nsilulu, ya kele ve dibanza ya Marie, kasi ya Nzambi, bukaka mielo. Ya kele, ya ke pesa muswa na muntu na kuluta na mwelo. Nkembo na Nzambi!

222 Yinki Yandi salaka? Na yina ya bakaka mielo nionso ya mbeni. Yandi bakaka mwelo ya kimbevo. Kimbevo lendaka ve kutelama na Ntwala ya Yandi. Ve, tata. To kima yankaka ve lendaka telema na Ntwala ya Yandi. Cortège ya matanga lendaka ve kutelama na Ntwala ya Yandi. Ve. Yinki Yandi salaka?

223 Josué kufwaka. Moise kufwaka. Bayankaka nionso kufwaka, kasi Nkuna yayi ya Kimfumu ve. Lufwa lendaka ve kutelama kisika Luzingu kele.

224 Kento yina ya Nain, kwisaka kuna na mwana ya yandi ya bakala. Yandi telemaka mpe tubaka, “Vumbuka, mwana.”

225 Mwana-kento yina vwandaka ya kufwa, mwana ya Jairus ya kento, Yandi tubaka mpova mosi kuna na yinsi yina me zabana ve kuna, mpe tubaka, “Mwana-kento, vumbuka.”

226 Lazare, kufwaka bilumbu yiya mpe nzutu ya yandi polaka, mpe moyo ya yandi kwendaka ntama na yawu, kubanda bilumbu yiya. Yandi tubaka, “Lazare, basika.” Nkembo!

227 Yandi yina. Yinki Yandi salaka? Yandi bukaka bidimbu ya bima nionso. Alleluia!

228 Ntangu Yandi zolaka kufwa kuna, Yandi lendaka ve kukanga luzingu yina. Yandi zolaka ata fioti ve kufwa, kasi Yandi zolaka kupesa luzingu yina. Mpe ntangu Yandi pesaka luzingu yina, Yandi kufwaka lufwa mosi. Mpe moyo ya Yandi ya ntalu,

mutindu Bibla me tuba, kulumukaka na difelo, samu na kubaka kisika ya munu mpe kisika ya beno. Nkuna ya Abraham ya Kimfumu! Yinki? Yandi vwandaka Nkuna ya Kimfumu. Oh, nkembo!

²²⁹ Ntangu yayi beto kele Nkuna ya Kimfumu, ya kele, yina ke kangama na Ndinga, kaka kieleka mutindu Yandi vwandaka. “Samu na mbandukulu vwandaka Ndinga, mpe Ndinga vwandaka na Nzambi; mpe Ndinga, kumaka nzutu, mpe zingaka na kati ya beto.” Beno ke mona ve kisika Nkuna ya Kimfumu me vwanda? Nkuna ya Kimfumu kele yina yina ke kangama na Ndinga.

²³⁰ Beno bantu ya kulemba yina me kubama na kukakula na diabulu, na mwatu ya yandi ya yinza. (Mu ke tuba ve na beno awa.) Kuna, beno milongi yna me zaba ti beno ke longaka ti bilumbu ya bimangu me lutaka, beno ke longaka ti ya kele ve na kima mutindu mbotika ya Mpeve-Santu, nsoni na beno, mpe beno ke kukibokila beno mosi Nkuna ya Abraham.

²³¹ Nkuna ya Kimfumu ke kangama na Ndinga. Nkuna ya Kimfumu, yina me butuka ve na muntu, kima mosi ve ya kusala na bakala to kento. Kento kele dibuundu; kima mosi ve ya kusala na dibuundu. Marie vwandaka ve na kima ya kusala na Nkuna yango. To dibuundu, yina ba me bokila organisation, kele na kima mosi ve ya kusala na Nkuna yango. Ya me butuka na yinki? Na organisation ve, na ba-Methodiste ve, na ba-Baptiste ve, na ba-Presbytérien ve, na ba-Catholique ve, na ba-Luthérien ve, mpe nionso yina.

²³² Kasi, yina me butuka na Nkuna ya Kimfumu ya nsilulu ya Nzambi, yandi yina ke baka mwelo ya mbeni. Ba me baka yawu dezia samu na yandi. “Na yina kana beno ke zinga na kati ya Munu, mpe Ndinga ya Munu ke zinga na kati ya beno, beno lomba yina beno me zola, ya ke salama samu na beno.” Beno me kuma kuna. Ya kele nsilulu. Ya me salama dezia.

²³³ Moyo ya Yandi ya ntalu kulumukaka na difelo, kisika mu zolaka kwenda. Kasi na kilumbu yina ya tatu. . . Samson bakaka mwelo ya mbanza na mukongo ya yandi, yandi vwandaka ve na kima ya kusala na yawu. Yandi bakaka mielo ya difelo, mielo ya ntoni, mpe bima nionso yankaka. Yandi nataka yawu ve na zulu ya mongo, Yandi bebisaka yawu. Alleluia! Yandi bakaka mwelo ya mbeni.

²³⁴ Ba-atimosifere yina fulukaka na ngolo ya diabulu, na zulu, ti Bawanzio to kima mosi ve lendaka kulumuka. Kuna kulomba lendaka vwanda ve, samu menga ya bankombo zolaka ve kukatula disumu. Kasi Menga ya Yandi mosi katulaka disumu.

²³⁵ Mpe Yandi zangukaka na Zulu, twadisaka muntu ya boloko muntu ya boloko. Yandi pesaka makabu na bantu. Ntangu yayi, Nkuna nionso ya Abraham yina me zola kufuta ntalu, samu na kukulumuka mpe kubalula ntima na masumu ya bawu,

kubotama na Nkumbu ya Yesu Klisto samu na mulemvo ya masumu ya beno, kufuluka na Mpeve-Santu, mpe kukanga ntima na kumekama.

²³⁶ Mpe ntangu ba me basisa yinza na beno, bima yango me kwenda, bima nionso ya yimbi, bima nionso yina ke monana yimbi, mutindu bakento na bansuki ya bawu, babakala na bisalu ya bawu, mpe mabuundu na ba-organisation ya bawu, mpe—mpe pasteur yina ke pesa madia na ba-diacre ya yandi, mpe—mpe bima yayi nionso ya mutindu na mutindu. Mwa kinkuku ya bima ya yinza ke kota kuna mpe ya ke sala ti pasteur yayi ya mputu, ba basisa yandi na nganda ya dibuundu.

²³⁷ Kwenda na ntuala, pasteur. Nzambi sakumuna nge. Kangama na Ndinga. Kubaka kima mosi ve.

²³⁸ Yandi zangukaka na Zulu. Yinki Yandi salaka? Yandi salaka dibulu, mwelo mosi, ya kele, kisambu ya Nkuna yayi ya Abraham. Samu na yinki? Samu na yinki? Kana beto kele Nzutu ya Klisto, kana beto kele ya kufwa, beto ke monana mutindu ya kufwa mpe ya kuzikama kati na Klisto, mpe beto me vumbuka na Yandi na mvumbukulu. Yand kele Yintu ya Nzutu. Kisika Yintu kele, Nzutu kele na Yawu. Mpe na yina, na suka yayi, kisika bayina nionso salaka yayi, “me vwanda na Yandi na bisika ya mazulu,” na Nkuna ya Kimfumu. Lukumu na Nzambi.

²³⁹ Mielo kele ve. Beno lendaka ve kusala ntama mingi *awa*, mpe kutuba, “Oh, oh, *ya kele* na mpova mosi.” Huh-uh. Ba ke kanga beno, kaka kuna.

²⁴⁰ Kasi kana ntima ya beto ke na kufundisa beto ve; kana beto me zaba ti beto ke tambula na misiku ya Nzambi; beto ke mona baluzingu ya beto me sukwama; beto ke mona yawu; Ndinga nionso yina Nzambi tumaka, beto ke zitisaka Yawu; na yina mielo ya mbeni nionso ba me baka yawu. “Na yina beno lomba yina beno me zola, ya ke salama samu na beno.” “Yandi ke baka mwelo ya mbeni ya yandi.” Oh, mpangi-bakala, yinki dibuundu ya ke vwanda!

²⁴¹ Ntangu mu ke vutuka diaka na Phoenix, kana Mfumu me pesa munu muswa, mu banza, ntangu mu ke kota na tabernacle yayi, ti bifu yayi ke vwanda ya kusungama, mpe bifu nionso na kati ya mouvement ya Nsangu ya mbote ya muvimba na mbanza yayi ke vwanda ya kusungama na basantu ya Nzambi ya moyo: beno tala mutindu Baklisto; beno tuba mutindu Baklisto; beno zinga mutindu Baklisto; na Mpeve ya Nzambi ke tambula na kati ya bawu, na yina, kana mosi me sumuka, Mpeve-Santu ke basisa yawu kaka kuna.

²⁴² Ya ke sala yawu. Beno me mona yawu na ndonga ya bisambu, awa na autel. Na yina, ya ke tuba, “Vutuka kuna mpe yidika yawu na bakala ya nge. Kwenda, tuba na kento ya nge kuna, mazusi na nkokila, na kento yina, beto vwandaka kisika *yina*.” Kana Ya ke sala yawu awa, na kutambulaka na Ndinga, beno

kuwa Ndinga yina ya fioti ya pima, Ya ke sala yawu na kati ya beno. Beno kele Nkuna ya Abraham. Na yina, beno kele na disumu ve.

²⁴³ Mulongi, beno ke zola kumona yawu na kati ya dibuundu ya beno? Beto ke tambula na kati ya yinzo-Nzambi yayi, mpe beno ke tala *awa*, beno ke mona babakala mpe bakento, na bunzambi, na busantu, me vwanda kaka kuna na kufuluka na ngolo ya Nzambi. Disumu lendaka ve kukota kuna. Bakala mosi ke kota kuna mpe ke vwanda, Mpeve ke telama mpe ke tuba, “John Jones, beno me katuka *kuna*, na mbanza mosi, na kisika *yayi*. Yandi kele awa samu na kuzwa kubeluka ya nzutu ya yandi. Beno me mona? Yandi me sala kima *yayi* na kisika *yayi*. Yandi salaka *yayi*, mpe yandi bakaka . . . me, baka *yayi*, sungika kima *yayi*, na yina Nzambi ke belula yandi na cancer yina. MUTINDU ME TUBA MFUMU.” Oh, oh!

²⁴⁴ Beno pesa munu dibuundu mosi, beno pesa munu babakala kumi, yina- . . . , kele kieleka mayaka ya Nzambi, Nkuna ya Kimfumu, beno tula babakala yina kintwadi, mpe beno tala yina ke salama. Beno pesa munu mwa yinzo ya fioti ya kufuluka na bantu mutindu yayi, mpe mu ke talisa na beno Nsemo yina wapi yinza ke kima mbangu. Ya kieleka. Yawu yina Nzambi ke zola beto kuvwanda. “Beno kele mbanza yina ba me tula na zulu ya mongo.” Beno kele Nkuna ya Abraham ya Kimfumu. “Ya ke baka mwelo ya mbeni ya yandi.”

²⁴⁵ Kimbevo, ya kele na diambu samu na kimbevo. Ya kele na diambu samu na bima yayi. Mpe Nzambi, Mpeve-Santu, kele awa samu na kutalisa kima yina mpe kutuba na beno samu na yinki beno ke bakaka yawu ve. Yinki kele diambu na beto? Beto fwana ve kukiyufula, “Ya ke sala yawu.” Ya me salaka yawu dezia. Yinki beno ke sala?

²⁴⁶ Beno tala profete yina. Yandi kuwaka mupepe ya ngolo, “Nkembo na Nzambi! Alleluia!”

²⁴⁷ Ya kele mbote. Ntangu yayi, beno bambuka moyo, mu ke fundisa yawu ve. Mu banza bantu nionso ke bakula yawu. Muntu mosi tubaka, “Mpangi Branham ke kwikilaka ve na kutuba, ‘Nkembo na Nzambi! Alleluia!’” Mbote, beno tala munu awa ntangu yayi. Mu ke kwikilaka na kuboka, kutuba bandinga ya malu-malu, kukina na Mpeve.

²⁴⁸ Kasi, mpangi, ntangu beno me zimbana na kuwa Ndinga yina ya fioti ya pima ya Ndinga, yawu yina kima ke bendaka beno. Kima yawu yina.

²⁴⁹ Elie zabaka ti reveil yayi nionso vwandaka luta na nganda. Kasi yandi vwandaka . . . Ya bendaka yandi na nganda ata fioti ve. Kasi ntangu yandi kuwaka Ndinga ya Nzambi ya fioti ya pima, na yina ya bendaka yandi. Mpe yandi tulaka na kizizi ya yandi, yandi basikaka. Samu na yinki? Elie vwandaka Nkuna ya Abraham, na kulandaka Ndinga.

250 “Kana beno ke zinga na kati ya Munu mpe Bandinga ya Munu ke zinga na kati ya beno, na yina beno lomba yina beno me zola, beno ke kuzwa yawu.”

Beto kulumusa bayintu ya beto na mwa ntangu fioti samu na kisambu.

251 Oh, dibuundu, wapi mutindu, ntangu mu ke manisaka na kulonga mutindu yayi, wapi mutindu mu ke vwandaka! Mpeve ke kwendaka ntama na munu, mpe mu ke talaka na manima. Mu ke mona bantu ke kulumuka na kati ya baposi ya bawu mpe ba ke baka madia ya bana ya bawu, samu na kupesa yawu na munu. Mu ke mona mwa bakento na kati awa, mbala yankaka na bansuki ya kuzenga. Yinki bawu ke sala? Ba ke salaka bima nionso na yinza samu na munu, yina ba lendaka sala. Bakala ke zinga na kento ya mutindu yina, mpe mu ke zenga yandi kaka bitini, na Ndinga yayi, mu ke lwadisa bansatu ya yandi, konsiansi ya yandi me kubwa. Mpe kasi bakala yayi ke basika awa mpe ke vwanda mpika, mpe yandi ke fidisa munu mosi ya kumi ya yandi. Ya kieleka. Yina ke sala munu, beno me mona, ntangu mu ke vutuka na nzutu, beno me mona, yinki mu me tuba? Mu zolaka ve kulwadisa. Ya kele ve mutindu yina.

252 Kasi, oh, mpangi-bakala, mpe cherie mpangi ya munu ya kento mpe mpangi-bakala, kana ya kele Ndinga ya Nzambi, mpe yayi kele Mpeve ya Yandi ke sala ti Ndinga yayi kukuma luzingu, na beno, yinki ya ke vwanda na Kilumbu ya Lusambusu? Mu ke meka na kukubika beno samu na kilumbu yina. Pardo, pardo beno baka kaka Ndinga ya Yandi. Kana mu me longa konso kima yina kele ve Ndinga, nsilulu ya Nzambi, na yina beno kele na muswa ya kukwisa na munu. Kasi yayi kele Ndinga. Mpe ya kele samu mu ke zolaka beno.

253 Ya kele ve samu mu—mu ke zola ve beno kota na masuwa. Ya kele samu masuwa ke kotisa beno ve. Beno ke beba, mosi ya bilumbu yayi.

254 Beno ke kwisa na Lusambusu. “Yina me kubwa na kima ya fioti kele ya kubwa ya muvimba.” Mpe ntangu beno me zaba ti kima mosi kele mbote na kusala yawu, ya kele Ndinga ya Nzambi mpe nsilulu samu na kusala yawu, kasi beno ke sala yawu ve, na yina yinki ya ke vwanda? Ba ke lomba beno na kupesa mvutu, ya kele yinki? Na yina Nsangu yayi ya suka yayi ke kutana na beno kuna na écran, na Kilumbu ya Lusambusu, yinki ya ke vwanda? Beno banza na yawu, bankundi. Beno lendaka kufwa na ntwala kilumbu kusuka. Beto nionso lendaka kufwa. Mpe kima mosi kele kieleka, beno ke kufwa.

255 Kilumbu mosi mu telamaka kuna ke tala mama ya munu, mu simbaka yandi na diboko ya munu. Mu simbaka tata ya munu ntangu fioti na ntwala ya yawu, mpe mu talaka yandi ke kwenda.

²⁵⁶ Mu monaka bawu ke kulumuka na nsuka ya nzila, yina banzaka ti ba vwandaka kieleka mbote mingi. Ba ke tuba, “Oh, Mpangi Branham, oh, kana mu lendaka kaka kuzinga fioti diaka!” Ntangu lutidi na ntangu yina. Mpe beno bambuka moyo, lufwa ke sobaka ve moyo. Ya ke sobaka kaka kisika ya kuvwanda. Mpe kana beno me mona yawu, kima mosi na kati ya beno. Beno banza ntangu yayi. Kana beno me mona yawu, kima mosi na kati ya beno ke sala ti beno kuzinga mutindu yina mpe beno kuwa mutindu yina, mutindu beno lendaka ve kuwa, beno balula ntima na suka yayi, beno ke sala yawu, nkundi? Beno kwisa. Beno vwanda. . . Beno fwana ve kuvwanda mutindu yina. Beno kele muntu ya kiadi. Beno zinga luzingu ya kieleka ya Nkuna ya Kimfumu. Nzambi ke zola beno bubu yayi.

²⁵⁷ Beno zola telemisa diboko ya beno, ntangu beno me kulumusa yintu ya beno, mpe ntima. Beno tuba, “Mpangi Branham, mu ke telemisa diboko ya munu na Nzambi. Na ludedomo, na ntima ya munu, yawu yina mu ke zola kuvwanda. Yawu yina ya kieleka mu ke zola kuvwanda. Mu me—mu me kubwa awa mpe nionso yankaka, kasi ya kieleka mu—mu ke zola ve kuvwanda mutindu yina. Mu ke zola kuvwanda yina nge me tuba na suka yayi. Sambila samu na munu, Mpangi Brannham. Mu ke telemisa maboko ya munu na Nzambi, na nge ve, Mpangi Branham, kasi na Nzambi. Mpe na kati ya ntima ya munu, Yandi me zaba ntima ya munu. Mu ke zola kuvwanda mutindu ya Muklisto yina nge me tuba, Nkuna ya Abraham ya kimfumu, na nzila ya Yesu Klisto.” Beno telemisa diboko ya beno ntangu yayi mpe beno tuba, “Mu ke. . . Sambila samu na munu, Mpangi Branham.” Nzambi sakumuna beno. Nzambi sakumuna beno. Ya kieleka Yandi ke sala yawu samu na beno.

²⁵⁸ Tata ya beto ya Mazulu, na Nsemo ya Ndinga ya Nge, kati na ngolo ya mvumbukulu ya Nge! Mpe mu ke ndima, Mfumu, ti bantu yayi ya mputu bambala mingi me tambula yimbi awa, mutindu na mutindu. . . Bantu me zaba na mpasi yinki kusala; mosi ke kwisa, yandi ke tuba kima mosi; mpe yankaka ke kwisa, yandi ke tuba kima yankaka.

²⁵⁹ Mpe awa na Phoenix, mbanza yayi ya nene ya—ya, mbote, ya bizieti, kisika bima nionso ya yinsi ke kwisaka, na nzutu mpe na kimpeve. Mu telemaka na zulu ya mongo, kilumbu yina, mpe mu vwandaka banza bambala yikwa ba me baka Nkumbu ya Nzambi na mpamba bubu yayi awa, ba-pité yikwa me salama, bambala yikwa disumu mpe mambu ya mvindu me salama na babala-bala awa, mpe banganda mpe banzini ya banganda, mpe bima nionso yankaka, mingi na kati ya bawu ke tubaka ti ba kele bakwikidi, Baklisto!

²⁶⁰ Bakento ke basika na bala-bala, na dikaya na diboko ya bawu. Ya ke tambula na bilele ya mansoni, na yina Nge tubaka ti ya vwandaka na nsungi ya yimbi na ntuala ya Nge, “Ya kele busafu,” mutindu urinoire ya ntama, ya mvindu, ya nzanzi,

kisika mosi kuna. O Nzambi, wapi mutindu kento yina ke tuba ti yandi kele na Mpeve-Santu ke sala kima ya mutindu yina, mpe na kuzabaka ti na mbombo ya Mvulusi, ya ke pesa nsunga ya yimbi, mutindu yayi? Wapi mutindu Yandi lendaka na kima ya mutindu yina na kati ya Kimfumu ya Yandi? Tata, kana ba zabaka kaka, ti ba kele na ba-million ya ba-kilomètre na Yawu.

²⁶¹ Mu ke sambila, Nzambi, kuwa mama. Ata muntu mosi ve ke zola kukwenda na bizunga yina ya bantu ya kuzimbana. Ata muntu mosi ve ke zola kukwenda kuna, Tata. Ntama na yawu ti ata mosi ve na kati ya beto kukwenda kuna. Kasi kuna na kati kele ntima ya mbote na kati ya muntu yina, bakala yina, kento yina, bakala mosi to kento yina kele na zola mpe bumbote mpe lutondo, mpe yina ba me vuna na diabulu. Diabulu me sala yawu.

²⁶² Satana, mu me telemina nge, samu nge kele mbeni ya Mfumu ya munu. Nge kele mbeni ya Ndinga ya Yandi. Mpe mu ke tuma nge, na Yesu Klisto, Mwana ya Nzambi, mutindu muntu ke kufwa, na kuzabaka ti mu kele ve na ngolo na kati ya munu mosi. Mu kele ve na ngolo ya kutelemisa nge. Mu kele ve na ngolo kuvedisa mosi ya bakento yayi, mosi ya babakala yayi, yina ke kuwa bande yayi, to—to konso kisika yina. Mu kele ve na mutindu ya kuvedisa bawu. Mu kele na ngolo ve. Kasi mu kele na kiyeka ya Ndinga ya Nzambi, mutindu kisadi, samu na kulonga Yawu, mpe kusalu ya kukangama na kiyeka yayi. To pulusu yayi kuna kele ve na ngolo ya kutelemisa tomabilu kasi yandi kele na kiyeka ya kusala yawu.

²⁶³ Mpe, Satana, nge lendaka mpe kukanga ba-frein ya nge, samu mu ke tuma nge, na Yesu Klisto, ti nge ke bika bantu yayi, bisika nionso na yinza, konso kisika yina Nsangu yayi ke kwenda. Bika bawu. Mu ke na kulomba bawu, ti ba me sumbama. Ba kele ve ya bawu mosi. Ba me sumbama na ntalu, Nkuna ya Abraham ya Kimfumu, Mfumu Yesu.

²⁶⁴ Nge muntu ya luvunu na nsunga ya yimbi, ya nzanzi, ya mvindu, yina ke vunaka bantu, yina ke twadisaka bawu na kimpofo na kati ya dibulu ya difelo, bika bawu. Mu ke tuma nge, na nzila ya Nzambi ya moyo, na nzila ya Munkayulu ya Mwana ya Yandi, Yesu, ti nge ke bika bawu, ti mioyo ya bawu ke fuluka na lusakumunu ya Yandi mpe Mvwandulu ya Yandi, ti ba ke baka mwelo ya bambeni nionso. [Kisika ya mpamba na bande—Mu.] Nge me kanga bawu ke vingila *yayi, yina, to yankaka*, to mwa kusimba ya busantu, to kima yankaka, kasi mu ke tuba na nge ti nge ke zimbisa luyalu ya nge na zulu ya bawu.

²⁶⁵ Wapi mutindu kimbevo lendaka telama na kupakulama ya mutindu yayi? Kaka ntangu ba ke manga na kutala kuna na nsilulu mutindu tata Abraham salaka, ntangu yandi lendaka mona Yandi na kifwani mosi bankama ya bamvula ntama kuna, ke kwisa.

266 Bika bawu. Na Nkumbu ya Yesu Klisto, bika bantu yayi kukwenda.

267 Bika ngolo ya Nzambi, lubakusu ya Ndinga, mutindu ba me sukwama na Yawu na suka yayi, bika bawu kuzwa lubakusu ya kukeba Ndinga ya Nzambi mpe bansilulu ya Yandi ya kieleka, luyalu yina Satana lendaka ve kubuka. Bika bawu nionso kukangama na nsilulu yayi, na kutubaka, “Yawu yayi. Mu ke simba Yawu. Nzambi salaka nsilulu. Mu kele nkuna ya Abraham. Wapi mutindu mu lendaka kutula ntembe na nsilulu ya Yandi?” Mpe beno kwenda, na Yesu Klisto, Mfumu ya beto. Amen.

Mu zola Yandi . . .

268 Ya ke na kuzenga na suka yayi, bankundi. Beto sambila malembe ntangu yayi.

Samu Yandi zolaka munu ntete
Mpe futaka mpulusu ya munu
Na yinti ya Calvaire.

269 Ya lendaka salama, ya kele ve luvwenzo, ve ya kieleka . . . Yayi kele—kele nsambululu. Beto telemisa maboko ya beto na Yandi yina beto ke zolaka. Mpe beno tuba:

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

270 Ntangu yayi, samu na kento nionso to mwana-kento yina kele awa, yayi kele diboko ya munu. Nzambi ke zolaka beno. Samu na bakala nionso to mwana-bakala yina kele awa, Nzambi ke zolaka beno. Mu ke zolaka beno. Ntangu yayi, mu lendaka ve kutanda diboko ya munu mpe kusimba maboko ya beno nionso, kasi Nzambi ke tuba na beno yina mu ke zola kutuba. Ntangu beto ke yimbila yawu diaka, beno balukaka kaka mpe beno pesa mbote na muntu mosi. “Na yayi bantu nionso ke zaba ti beno kele bilandi ya Munu, ntangu beno ke zolana, mosi na yankaka.”

Munu . . .
Mpe futaka mpulusu ya munu
Na yinti ya Calvaire.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

271 Beno ke zolaka Yandi ve? Nsatu yayi ya lembami ya Mpeve-Santu! Ndinga ke sukula, ke katula beno mvindu, ke sala beno kivangu ya malu-malu, ya ke katula nionso. Ndinga kele nsongi mingi kulutila mbele ya meno zole, ke sala nzengolo, ke katula bima nionso ya yinza. Beno me mona? Na yina beto me kuma ya kuvedila, ya kukondwa mvindu, ke ndima mpe ke kwikila Yandi. Yawu yina beto lendaka yimbila:

Mu zola Yandi, mu zola Yandi
 Samu Yandi zolaka munu ntete
 Mpe futaka mpulusu ya munu
 Na Calvaire.

²⁷² Ya kele kitoko? Mu ke zolaka yawu kaka na ntima ya munu ya muvimba. Beno me mona? Beto meka yawu diaka, beto nionso ntangu yayi, ya kieleka, tii na nsuka ya ndinga ya beno ntangu yayi.

Mu zola Yandi, mu zola Yandi
 Samu Yandi zolaka munu ntete
 Mpe futaka mpulusu ya munu
 Na Calvaire . . .



MPE NKUNA YA NGE KE BAKA MWELO YA MBENI YA YANDI KNG62-0121M
(And Thy Seed Shall Possess The Gate Of His Enemy)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 21 ya Ngonda ya ntete, na mvula 1962, na Faith Tabernacle na Phoenix, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org